

## بني هلال

بني هلال تواريخهم كبار ولا يَمْحَى قَصِيدَهُمْ. اميرهم حسن ابن سرحان وفارسهم سلامه ابا زيد، ابا زيد رَجَّالٌ مَنِيَّةٌ بِالْفَرَسِ وَلَا يَهْدُ عَلَيْهِ. من عرض ما جرى عليه غزى على له فرس، هاللي ارثت سالفه اللي يقول: كل خفي يادفين بيين. غزى الى مير فَرِيْسِيَّتُهُ دَبْرًا وِجَا مَنُكْفٍ. يوم جاك منكف ويَبْنِقُ به راعي هكالزمل راكب واحد ويتليه واحد. مشى معه، قال: ياخويي جَمَعَتْنَا الْخَوْهَ وَهَالْحَيْنَ اَنَا فَتَرْتُ مِنْ الْمَشِيِّ وَفَرَسِي هَذَا دَبْرًا مَا تَنْرُكِبُ، مَا تَخْلَيْنَ اَرْكَبُ عَلَى هَالْجَمَلِ الَّذِي يَتَلِيكَ. قال: والله ياخويي الجمل جالبه وذلك تعفَسُ ذروته، ما ودي تعفَسُ ذروته. قال: زاد خل الجمل هذا، اجل استردفني على هالجمل اللي انت راكب. قال: والله الجمل اللي انا راكب راكب عليه انا وقشي ولا يقوى الا انا ولا اقدر والله امشي انا. قال: زاد يحلّه الله. دلي يباريه يقود فرسه. الفرس دبرا ما يقدر يركبه. التفت راعي الزمل، يوم التفت يا يشوف الغاره يوم انكبت عليهم، قوم. وهو يلتفت على خويّه، قال: وش اسمك ياخويي؟ ما يعرفه هو. قال: انا اسمي سلامه. قال: ما تقول لي

انت ياخويي ياخوي الجنب سلامه  
ان جانا بالخلا زود اثنين  
انت طيب تنطح حديهم  
او ردي وتقهر الجمليين؟  
قال: انت وش اسمك انت؟ قال: انا اسمي دفين. قال:  
والله الا طيب وانطح حديهم  
وانطح لو جانا زود اثنين  
ولو جتنا قوم عرضها مثل طولها  
خله لي وانت اقهر الجمليين  
قال:

من اين لك يا عذب السجايا خياله؟  
قال:

يجي مَشَلٌّ فَوْقَ مَشْمَرٍ  
مَسْبَقٌ يَبِي طَقَّةَ الْجَمَلِينَ  
واضربه بهالشلفا السنينه  
ليا هاوية ليا حد الجبين  
وان كان انت مكذب فانشد ربي  
وكل خفي يادفين بيين  
قال: واخوفتي الى انك ابا زيد وانا ترديت بك. قال: اي بالله انا ابا زيد مير  
اخاف انك ردي من اول. لو انت طيب ما امداك تردى.

ابا زيد تهاوى هو وايا عليا، اللي هي يعني مورثة بالسوالف، يقال عليا و ابا زيد وعشقه مع عليا بهالديار، هو هذا هضب عليا بهذا. تعاشق هو واياه يا مير هي ما هي منهم، هي عقلييه، من عقيل، وتهاوت هي و ابا زيد وبييه ابا زيد وحده عنها. وقف عمه حسن ابن سرحان قال: ابد والله ما تاخذه. وطرده عنه. عرضوا عليه كل مزايين بنات بني هلال يتخير منهن ويترك عليا، منهن وطفًا بنت ذياب ابن غانم وعيى بيهن. وزعلت عليه بنت ذياب يوم انه ما بغاه، يوم تقول:

انا اخير من عليا بَعْنُقٍ وَمَفْرَعٍ  
بينهم عاد مقاصد عليا و ابا زيد. هو يقول:

عهدي بعليا والقنا يذرع القنا  
عَقَيْلِيَّةٍ كُن القراطيس خدها  
ان وَقَفْت دق العسيلي وركها  
لا هيب لا دنّا ولا دوبليــــــــــــه  
عِيّوا على عليا عَقَيْلِ كلهم  
عِيّ عليها الله وفعل ابن عمها  
عِيّ على عليا العلاطي محمد  
عِيّ على عليا العلاطي محمد  
عليا ليا من حرفوا ذارع القنا  
وهي تقول:

ياركب ياللي من عصير تَقَلُّوا  
أوصيكم وصاة ما تثقل ركابكم  
ليا جيتوا اسمر ما يزر هدومه  
يا ابا زيد تنساني وتنسى جمايلي  
وش انت خابر يوم الارطاه دوننا  
يا ابا زيد لو النساء تركب النضا  
تسمع صريخ الكور حدري وفوقها  
عَزَالِيَّةِ المقدم جمالية القفا  
تري الوسم يا ابا زيد بكر علينا  
نبيع لي باعوا ونشري ليا شروا

وانزلوا على قاع الهاللي، قاع يخبرونه هالريع، هو هذا بحدري الصفرا ببطين  
ابو روادف من جاي، دون ابضه المسماه اللي حصل عليه العرکه بين الاسلام بينهم.  
نزلوا على القاع مليات ما. قال ابن سرحان، عمه، عم ابا زيد: الما لا يخوض به  
الحلال، لا يشرب الحلال الا بعده يجذب، ابد انه يوتى الا بدلو يجذب، لاجل انه ما  
يندمر الما. يا مار العَقَيْلِي بغربي الما، ابو عليا، وابن سرحان اطنابه بشنق الما من  
شرق. قال سلامه للبتت: اركبي على الجمل وخليه يدش الما حيث ان عمي لازم انه  
يبي ينحر هاللي دش الما ويشوفك غديه يا شافك يعذرن ويرخص لي بك. دشت الما  
على الجمل، يوم انه دشتته واقبل عليه وهي تطلع قُرُونَه وهي تدنق وهي تجدعهن  
بالغدِير وهي تمتح قرنه وتمص ذوابة قرنه قالت: ياعم حسن ماكم مطروق. يقولون  
المسولفه انه سهى وخذف السيف انطلق من يده من دون ما يشعر وضرب الحصان  
وشظف راسه. هو ماشع السيف اول يبي يضرب هالبعير اللي دش يحسب ان اللي  
عليه رَجَال. عنده له صلبى ذل من الزعل يوم شاف الامير زعلان وضرب، الله يعز

الرَّجَالِ، الحمار بالميقعه، يعني بزعمه يبي يرضي الامير، قال: يا صار الشيوخ  
يقتطعون روس خيلهم حنا نقول هذا حمار طقه البغار ومات. قال حسن: وش الانثى  
هذي؟ قالوا: هذي بنت العُقيلي اللي عاشق بناخيك سلامة. قال:

نظرت انا على جال الطرودي نظره      بعصير وجانا من عقيل ورودها  
قولوا لطراد الهوى يطرد الهوى      بالاجهاد ولا يرده الاحسودها  
قعدوا بهذا وفاضوا حسن و ابا زيد معهم الهلالايه، والعُقيلي، ابو عليا، انتبر  
بهذا، بالديار هذي ما فاض. حتى انه يوم ابعد، انت يا ابا زيد صابه ضيقة صدر  
وزعل على فراق عليا، ان العُقيلي قعد، اجلد بعرض الفرجه ما نهج معهم يم الربيع.  
قالوا الهلالايه: يالربيع خلوا البليّة هذا يرحل. قالوا: ما يرحل وهو يخبر عليا قفوه.  
قالوا: وش الحيله. قالوا: الحيله نبي نشرط لنا لصلبي نقول ايتنا الصبح من سد  
الخلا والى جيت وحوّلت عند ابا زيد والمجلس صاك نبي ننشدك نقول من اين انت  
جاي، قل جاي من عرب العُقيلي ونبي نسعلك نقول العُقيلي وش قعد، هو ما يبي  
يجي، قولة العُقيلي قعدت بنت له وجعانه وتوفيه (= توفت) ونبي ننشدك البنت وش  
اسمه، قل اسمه عليا، اغديه ييس ويرحل بنا يم الربيع، يتمدى مع الربيع، هاللي  
تبرنا بهالمنزل المدهر سلامة هو وعشيقته. جاهم الصلبي من سد الخلا. قالوا هذا  
طرقي جا من يم عرباننا يجيب لنا العلوم. جا يوم جا قالوا هذا صلبي هاللي جا.  
حوّل وربط زمالته بشنق البيت وجا وقعد عندهم بالمجلس. قالوا: من اين جيت  
ياللحيه الغانمه؟ قال: والله جاي من عربانكم هاللي فوق. قالوا: ما عينت العُقيلي.  
قال: والله العُقيلي بالديار هناك اول مانعته بنته عليا وجعانه وتوفيه ويبي يقبل جاي.  
قالوا: عودا، ماتت عليا؟ قال: ماتت. قالوا: وكاد. قال: وكاد، انا حاضر دفتته. انتبه  
ابا زيد واخذ السيف، شامان، سيفه، اطلق بلام السيف وجره من جفيره قال: عنك  
يالصلبي ان عليا ماتت، شوف عينك؟ قال: ياعمي دفته وانا واقف عندهم واكلت من  
دفتته اللي هو سوّى يوم ماتيه<sup>(١)</sup>. قال:

دنيك ما دامت لجديع ابن فاضل      يبي يبيد الدنيا وبقعا تزيده  
من عقب ما ربط تسعين صفرا      وتسعين نقال القنا من عبيده  
اومت به الدنيا الى ما رمت به      واليوم على جريا جعيف بديده  
هذا تضحك به وهذا تمكر به      لما بيّدتهم بيد الله بيده  
له مقلب يلحق ما طار بالسما      ومستنفج يستنفجه من لبيده  
تاخذ ما بين اليدين وتنثني      على الروح ياويل الفتى من وعيده  
ما تذبحون الموت يا جملة الملا      الموت واحد والناس واف عبيده  
حيث انه خذى طفلة عسوجيه      ليا الحول تلقى ريحها مع رقيده  
الى جيت عليا يالصلبي قل له      الناس عيدوا وهي عاد عبيده

(١) انظر ما فعله ابن قدران مع زوجة شايح الامسح تحت العنوان الفرعي "شايح يذبح ابن قدران ويشيخ  
بالرمال" ضمن العنوان الرئيسي "شايح الامسح وابن قدران".

قالوا نبي نلاعب ابا زيد نلهيه عن عليا لا يقصد به، هو كل يوم يقصد به قصيده. قوموا يلاعبونه البيه، اللي يلاعبونه بدمن البل. ويلاعبونه نهارهم كله بيون يلهونه لا يقصد بعليا. يوم هرقت الشمس للمغيب والتفت والى الشمس تبي تغيب، قال:

جا الليل ما قلنا بعليا مثايل      يقطعك ياايوم يروح بلاش  
له ريق احلى من الما على الضما      واحلى من السكر وكل معاش  
واحلى من اللي ينقر الطير راسها      ينوشها بين الجريد نواش  
واحلى من لبن المطافيل بالشتا      لى جات من خطو النقااع تُحاش

هم مدهرين ومهزئين وجيعانين. يوم جا هكالليلة ويذبح حسن ابن سرحان عشرين فاطر ويقسمه قيته على عربيه: انطوا فلان يد وانطوا فلان ظهر وانطوا فلان جنب، هاللون. يوم جا الليل وبغى ينام يقول يامير كبده يوم اوجعته، جاع. راحت عشرين هالفاطر ولا بقى منهن بيته ما يفطر الصايم. يقول يا مير يسمع عند مرته حرکه، قال: يام عامر، ما عندك عشا؟ قالت: والله يا حسن اني اقصم من جلد هالفصّر زوايا قد واشوي وأكل. ابا زيد معه بنتك يا حسن وعادي عليه يبي يذبحه ويأخذ منه الامره (= الأماره). يوم سمع كلامهم قال: عجيب، هالحين رجل ذابح عشرين فاطر للعرب ولا تعشى ومرته تاكل من القد اذبحه انا! وهو ينكس. لوذ على بنت حسن، اللي هي مرته، قال: شوفي يد الفاطر اللي جتنا العصر من ابوك سوي لهم منه عشا، ترى ابوك ما تعشى. حمست اللحمه وودته لبنت ابوه. اقعدته مرته: حسن، حسن، دونك هاللحيمه جابته لك بنتك. قال: لعن الله ابو ذا، ترو يوم اشحك القد جاي يبي يذبحن وسمعنا ملعون الوالدين، والا وش ادراوه اني ما تعشيت! يقول ابا زيد يوم يتهقوى يذبح عمه:

نفسى تمنيني على ذبح خير      على غير حق وهمة من وهومها  
وهو يذبح الكوما الى قلص القرا      ولا قال يكفي درها عن لحومها  
لولاه ما بتنا بنجد عشيه      ولا وقفت زلباتنا في حزومها  
لو العجوز العامريه ما ارثت      لنا حسن كنا جميع نلومها

هم مسكنهم من المقوقى على الوادي على الغيبه. ويرسل الله عليهم القحط ثمان سنين بنجد. بنت حسن ابن سرحان يا من هذا سرت. قالت مرة ابوه: بنتك تسري لعشير<sup>(١)</sup>. وهو يساريه ابوه. وهي تشبط له راس طويله وتخيل البرق: عزك، عزك، عزك. يا والله ما هي يم العشران. قال: وش تخيلين؟ قالت: اخيل البرق. قال: وين هو؟ قالت: ما تشوفه انت، انا يالله اشوفه، بعيد. قال: نبي نروده يابنتي. قالت: شف الرجال اللي الى ركب ما يفتّر ويتحول من جنب الى جنب لما ينزل من على الشداد،

(١) هذا شبيه بما حدث مع بنت ابن قدران كما ورد تحت العنوان الفرعي "شيخة ابن قدران بالرمال" ضمن العنوان الرئيسي "شايح الامسح وابن قدران"، وما حدث مع بهيجه كما ورد تحت العنوان الفرعي "عده" ضمن العنوان الرئيسي "قرايا الغفيله".

واللي يا حط رمحه على متنه ما يديره على متنه هذاك لما يجلس، واللي لى جلس ما يتململ ولا ينجضع بمجلسه لا يمين ولا يسار. حط الببال يا والله ابا زيد وعيال اخته الاثنين مرعي ويونس هم اللي بهم هالشارات ويرودهم. يوم اقبلوا الرواويد على تونس يا هل تونس ما يعرفون البعير. لقوا اثر البعارين يا والله ما يدرون وشن. نادوا الصفيرا بنت الزناتي خليفه ترمّل لهم. قالت: هذي ارقابه مثل القيسان وتاطا على مثل الرغفان ويتناوطن زرع البستان من ورا الحيطان، والله ما ادري وشن. والحقوهم واطرحوهم. يوم جابوهم قالوا له: وين اميرهم؟ قالت: اميرهم هالمزيون. تشّر على مرعي. قال ابوه: لا، اميرهم هالاسود هذا -يعني ابا زيد- شوفي متونه دبار من نقل الرماح واكفوفه كبار من نفخ السلاح ورجليه حنّف من لكد الفلي. قالت: هذا عبد يخدم ربه وهذا اللي مودعه دبار متونه من شيل الحطب وكبار كفوفه من عجن العجين وحنف رجليه من طحن الرحي. هي تدري ان ابا زيد هو الامير بس تبي ابوه يربط المزيون، مرعي، طاحت قاعته عند مرعي، تبيه. قال: قم ياالعلام اقرطه بالبحر، كان هو عبد فهو يطفح وان كان هو حر يغيص ويموت ونرتاح منه. ورح به ياالعلام ودلى يتخيل عليهم ابا زيد يقطعّ بهم من جرف لعدامه. يوم سمعتهم الصفيرا وشافته اخذه يبي يرميه بالبحر خافت يعرفون ان ابا زيد هو الامير ويدرون انه تكذب عليهم يوم تقول لهم اطلقوه واربطوا مرعي، خافت يربطونه هو ويطلقون مرعي، هي ماتت على مرعي، تبيه، امير تلبسي وتزيئي ومري من عندهم، مرت من عند العلام وغمرت له قالت:

ترى عندنا لك تعلّة عقب عشوه يا جا بليال الشتا بالصرايم  
يعني تجي عندي بالليل واغطيك معي بالفراش. تبي تطمعه علشان يخلي ابا زيد.  
التفت العلام على ابا زيد قال: انا اشوف انك نادر ربك، لكن علمن من انت. قال:  
من خلق الله. قال: علمن، ترن اعرفك، ولكن والله ان ما علمتن لاطوحك بهالبحر تغرق  
والا تطفح، واما كان هو انت ابا زيد -اتهم ان ذيك عارفته، تضرب بالرمل وتعرفه-  
فانت عليك الله وامان الله ما يجيك مني السموم الحار لأنكسك مثل ما جيت. قال:  
اي بالله انا ابا زيد. قال: وش جابك؟ قال: رواد لهلي اكشف الاريض لقومي. قال:  
عاهدن ان اطلقتك وجيتونا انك تجيب القوم اللي تشبعن طراد، الا انا ما تجين ولا  
اجيك. قال: والله ما لك الا نشبعك طراد. قال: عطن الله وامان الله. ويتعاهدون ان ما  
واحد يمد يده على الثاني. تعاهدوا وحط عليه من زيد البحر وانكس به. قال: يا عمي  
هذاتا عبد كمي، ما جرعه الما. واربطوا مرعي وروحوا الباقيين. يوم بغوا يمشون  
قالت لهم الصفيرا: شوفوا ترى قدامكم جب بربعة من خلا، مقطعه، مظماه، ما هنا  
غيره بس عليه له راصود، حارس، رووا منه وانتم عجلين، ان مليتوا قربكم لا تسقون  
ركابكم وان اسقيتوا ركابكم لا تملون قربكم، استعجلوا ترى عنده راصود ان تولاكم  
هلكوا. يوم رووا القرب مستاحشين هم من هاللي هي ذكرت لهم ومستعجلين، يوم

ملّوا قريهم قُصِبُوا عدتهم وأقْفُوا من الجب والله يوم حنت ناقة ابا زيد سيهله،  
 ظميانه. قال: سيهله تنخانا، رجعنا نروي ركابنا، لكن انا انطح عنك اللي يجيك من يم  
 السما وانت انطح اللي يجيك من يم الارض. اثارى الراصود مناوحهم بله جبل. والى  
 والله يوم جاهم موحف واظربه يابا زيد بالسيف يا قاطعه قطعتين راسه طاح بالقلب  
 وقطعة منه طاحت من طالع القلب. واللى طاح بالقلب ضرب اللي يمتح الما يا شالق  
 بطنه. قال ابا زيد:

سمعت يمك يافتى الجود ونه      عسك منها يافتى الجود سالم  
 قال:

انا سالم سلمت من كل هيّيه      والراس ما تطوى عليه العمائم  
 اني يعني ما نيب عايش.

انا سالم لو ما ازرق الناب صابني      ضربني بنابه واتقى بالردايم  
 حلفت انا لارويك واروي ركايبك      واخلي الما من على الحوض عايم  
 انا خايف ياخال هذي منيتي      من رافقك ياخال ما رد سالم

طلع ومات وقبره ابا زيد وعقر ذلوله عليه. ركب سيهله وتوكل على الله وجاك  
 على ذلوله شحّوتتي لحاله. وعلى ما اقفى من الجب والى ثلاث هكالقطوات يوم طارن  
 بوجه سيهله. سيهله من سبّقه يطير الطير ويتليش ويوقّع ويلحقه ويقضبه. وهو يجيك  
 مهيف ويوم جا العصير وهن يتماطنن الفطيات عند وجه سيهله، تعبن. وخذاهن،  
 وحده كتّفه ووحده قطع راسه ووحده خلاها سلم، وحطهن بالمزوده. يوم جا تيما  
 والى عليه عرب وبناتهم يغنن. يوم هو يقول:

ياسيهله مع بطن الغراميل ذوملي      دافى الغطا ما ذاق لذ سسراك  
 تخاويت انا والقطا من مقيله      اثر القطا هزلى وركظه ماش  
 مريت انا تيما على هجة العرب      وسمعت لعب وغي بنات  
 تعرّضتني منهن بيضا مليحه      تقول ياراع النجيبه بات  
 عشاك حليب بسعن مبرد      وفراشك نهيدي والحريير غطاك  
 يازينة العينين قلبي مشقى      همّن غريب تحت النجوم شتات  
 منهم من ذر الشمس ومنهم مغيبها      ومنهم من حي ومنهم من مات  
 ان سلم الله راسي وسلمت فاطري      شريق الضحى وانا رقيب قلات

قلات بشنق هالحرّة من جاي. جا هله ونام ويتنونه الهلالات بيون ياخذون علومه.  
 قالت بنت له: ابوي نلقى العلم بمزودته. فكوا المزوده ولقوا القطا وعرفوا ان السلم هو  
 وان خوياوه واحد مات وواحد ربيط. والاه حاط بعد بالمزوده عشب وحنطه وحاط  
 القديمي عليهم. قالت يقول لكم ان الديرة اللي هو جا منه به عشب وحنطه لكن ما  
 تالونه الا بحرب، دونه رجال بيون يفكونه. يوم عطاهم ابا زيد علومه واللى هو شاف  
 بتونس نووا انهم يحولون يمه. يوم نووا يقفون عن نجد قال ابا زيد:

يانجد وان جاك الحيا فازعجي لنا      شبّي لنا براس المّقوقي نار

المَقْوَقِي هَالِلي وِرا اَبانات.

ثمان سنين ما هوى نجد قطره  
لك الله صبيان لنا ما تغيروا  
ويرحلون ويجونك محيلين وينزلون اول ما نزلوا ياطب. ومن مارد لمارد ويدلون لك  
يقصدون يوصفون محاويلهم. يقول واحد منهم:

وردنا على تسعين عين جريه  
وضاق بنا ما بين سقف وموقق  
يانجد لو ان الجفا منك مره  
يانجد وان جاك الحيا فازعجي لي  
قضى عمرنا وحننا نداري زماننا  
ويقول الآخر<sup>(١)</sup>:

رحلنا ولا ابقينا بنجد حسوفه  
غربيها زيزاً بها الريم والمها  
تلقى بنات البدو تلعب بجرعها  
ياما نلاعبهن الى خيم الدجا  
الفين ورد الما وألفين صدره  
خرزنا دلاها جلد تسعين بكره  
الى زاد ورده زاد فييـاح جمه  
بذرنا عليه الجود لين امحلت به  
حلنا وعنه النفس ما هيب طايبيه  
دفنناه عن ناس تولاه بعـدنا

هذا حسن ابن سرحان قال له ابا زيد: ارحل، ابعـد المرحال ياعمي لا تصير كـنك  
ولد حضريه، الديار اللي حنا نبي نحول يمه بعيد. تمثل حسن، لكن اني انا ما احيط  
بكل كلامه، يوصف مماشيهـم ويعدد معاشيهـم:

انا حسن ما انا ولد حـيـضريه  
انا حسن هراج مـراج مجلس  
درني وتلقاني ورا شمخ الذرا  
اضرب لعيني بكرتي حلوة اللبن  
تملى القـدح ثاني وتملاوه ثالث  
مع ابلنا تسعة الاف خلفه  
رعـيانها تسعين عبـد مقنزع  
الى نزلنا منزل ما يسـررها  
يابعد ديار لقتها قـفـيه

(١) وهي تتداخل في الوزن والقافية والمنحى العام وقائمة الأماكن مع قصيدة مماثلة ينسبها الرواة للضياغم.

والله يالولا شـارتين يجن به  
عشيه عشينا بعكاش ياطب  
وعشيه عشينا بضياع وضيعت  
ماهن ما هو حلو، ما به نفع، من قشر ماهن، وخام ماهن، مروح، الناقه ما  
ترضع ولده هكالليله، ما تدر.

وعشيه عشينا بقصور جوف نقره  
وعشيه عشينا مصدات والنقا  
يم النفود، نوازي بهن غضا.

وعشيه عشينا طعاميس حومه  
وعشيه عشينا شقرا ووشيقر  
الاطوا خمسين بوع هو هذا بوسط هالنفود.

وعشيه عشينا الحفر دبه الحيا  
يجي ثلاث رحلات من النفود من غاد. لاقيات الحيا شجيرات لهن خمس سنين،  
ست سنين تسقمت بهن.

وعشيه عشينا مقاديم فاطري  
ديده حلبوه هكالليله صار به له جغيمه.

وعشيه عشينا بديرة ما نعرفه  
العصر جقلنا عواشي بقوره  
وهم لك يعزمون على الرحيل، غدوا ثلاث سبحات؟ هذا حسن تمتنى خيبر  
والمدينه، وهذا ابا زيد جا من هنا مع حايل على الزرقا، وهذا نياي ابن غانم راح مع  
خط العراق. قوم حسن تجشموا الشريف ابن هاشم بالمدينه وعيى عليهم يشربون الا  
ان عطوه الجازيه بنت حسن ابن سرحان، الجازيه مثل ميثا على ما حكوا به، ما له  
لطيم مع النساء. قال شكر: لا تسقونهم ياهل المدينه الا من تحت امري. هم بيون الما،  
معطشين وبيون الما وعيوا عليهم. قالوا: والله الامير عيى علينا نسقيكم، ما نقوى  
نسقيكم كود بامر الامير. جوا الامير: ياطويل العمر نبي نشرب. قال: والله ما  
تذوقونه الا ان عطيتون الجازيه، كان الجازيه تحصل منكم فانا ارحصت لكم وما  
يخالف، الله يحييكم وابشروا بالعز. يوم شافوا وغدانهم وحرهمم وخليهم بدت تناقز  
وتموت عطش قالوا انطوه اياه ذبحنا العطش، الشكوى لله. قالوا: ننطيك الجازيه بس  
نبيك تعاهدنا ياطويل العمر انك ما تزقه الا بوسط بيوتنا، نبنى لكم خيمة بوسط  
البيوت وتدخل عليه. قال: ما يخالف. تعاهدوا هم واياوه على هالامر ولازوا بشنق  
الشعيب يوم يقول هاك عن المدينه بلهم لوده ونزلوا وبنوا له خيمة ووسط بيوتهم.  
حطوا له الخيمه بالوسط ودخل عليه وحطوا لهم غريسة زينة بمدخل البيت. يوم لاح  
البرق قالوا ما نقوى نرحل ونخلي الجازي. هكالحين عندهم فهدات يقنصون بهن  
على الخيل ويطرحون الظبا والوضيحي والنعام. بعد كم يوم قالوا له: ترونا باكر نبي  
نجهم نروح نقنص ونبيك تروح تقنص معنا توسع صدرك. قال: معكم. هم الى راحوا



يقصون به ناس منهم موكلين لهم انهم يشيلون خيمة الشريف والجازي وغريستهم ويرحلون، يغربون والى عشوا، نزلوا، ينصبون الخيمة مثل ما كانت اول من شان هو ما يستنكر. صاروا هم كل يوم ياخذونه معهم يقنص وباقي العرب يندفعون يم الغرب والى جا العشا نزلوا ويبنون بيت الشريف والجازيه ويحطون الغريسه قدامه مثل ما كان اول. الشريف ما يجي من المقنص معهم الا الى اظلمت العين ودايخ من التعب والطراد وما يستنكر شين. والى جا بالليل ونام مع الجازيه لعبه وعلومه وسوالفه الحلوه تنقض التعب والى جا من باكر وبغوا يروحون للقنص والى هو جاهم مع اولهم. تولع. يوم قلعوا مصغاوه ثلاث مراحل، ودره، نووا انهم عاد يكملون دبرتهم معه. البنت مغليته بس ما تقوى تخالف راي اهله، لو كانت مغليته وحبته. عرفت البنت انهم باكر الصبح نووا به النيه. يوم جا الفجر قالت:

ياشكر ياشكر الشريف ابن هاشم      ظريف وصادوك الرججال الظرايف  
قال:

ياالجازيه عهد الله بيني وبينهم      شديد العرى يامن بهن كل خايف  
قالت:

ياشكر عهد الله نوب مغره      يحدر الفتى من عاليات المشارف  
ياشكر ما تنظر عضادي زلمهم      من الضمر مزويات زوي العكايف  
والى ترخى مشيها بطنوا له      مطارق طرفا لينات لطايف  
ياشكر ما تنظر عسابين نخلتك      ما باق الا لبها والظرايف  
قال:

مز الاشافي بالاشافي ورسني      وترنا غير اليوم ما حنا بالاياف  
قالت: الى جوك تراهم يبون يخيروك بين بيض عيونك والا بيض رجليك قل ابي  
بيض رجليي ولا بيض عيوني. يوم جا الصبح جوه وخيروه واختار بيض رجلية. جا  
الصانع ونقر بيض كعوب رجلية. واطلبي له عبد، قالت: ابي هالعبد خلوه معه لا  
يحافيكم الله بابن هالحموله ويعاقبكم ربكم باللي سويتوا به. واثاريه هي كل ليله من  
رحلتهم، كل مراحلهم هذولي تحط بمطب الغريسه له سحلة ما وقرص رغيف وبيض  
نعام ثنتين، وحده مسلوقه ياكله ووحده نيه يفضحه على رجله، سنع علاج، وقطن  
وخبوب من شان يحزم القطن والخبوب على رجلية. هي من الاول عارفة دبرتهم به  
مير ما قوت تعلمه، ذاللة من اهله لو تعلمه. علمت العبد وقالت له امش مع اثنا وكل  
ما وصلت منزل من منازلنا اللي شدينا منه احفر وتلقى الزاد والماء والخبوب والقطن،  
والله الله ما هوب انا اللي اوصيك على عمك. اثارى الاشراف فزعوا يوم تباطوهم.  
يوم ما لقوهم بمحلهم اطلبوهم والى هنا بناخي للشريف، عمه شكر، اسمه نجم على  
له حصان اشقر ما فطنوا العرب الا يوم طلع عليهم، هم رحيل. قالت الجازيه:

ياعمي لحقنا راعي اشقر جا يحته      يذوح بتالى الخيل يبي المدايح  
ان طعتني ياعم فانت ارمني له      تعوض بي ربعك وجيه فالايح

قال له عمه:

جاليك ما تشوفين الدهم دهم آل راشد  
وهي تنكس وهي تعانق الولد على جملة قبل ما ياصلهم، تعرفه هي. قالت:  
يانجم ما لأمك من الولد غيرك  
يانجم شف اهل عشر تواعدوا بك  
قال:

عيب على مثلي يهد وينثني  
انا كما نجم يدق عالي الشذب  
وهو يحرفه على الجمل، جملة، نكس به. وهو يلكد عليه حدى خيالتهم وهو  
يضره بالرقبه يا جادع راسه. حملت الجازي من شكر الشريف تجيب ولد ويسمونه  
محمد. هذا شكر جا ينقله العبد يما وصله المدينة، يوم هو يقول:

قال شكر الشريف ابن هاشم  
يا طقت اليمنى بهامي تذكرت  
ولا يد الايد الله فوقها  
ولا شبعة الا مقتفيا جوعه  
خذيت انا تسعين عذرا مليحه  
وستين من مهورات الاوساط رجع  
ولا شاقن الا الجازية ام محمد  
لكن حديث الليل بيني وبينها  
هو ليه ما تبكن الجازيه ام محمد  
يحرم علي اكلي بالثلاث كلهن  
اولهن عيني كل ما صار عبره  
وثانيهن كبدي كل ما صار ضيقه  
وثالثهن قلبي كل ما صار ما جرى  
ياشاربين التتن لا تشربونه  
حلفت ما اجيبه لضيبي ولو بكا  
شربته من وجلا الجازية ام محمد  
يا صار ما تبريه بمجاول الرمك  
يا صار ما تغديه بمجاول الصبا  
العنك يارجل ما يسطي بك الطنا  
انا كما حر على الصيد عالم  
ابا زيد والربع اللي معه وردوا على الزرقا بالاردن. ويجيهم شبيب ابن شيبان  
ويتلاقي هو و ابا زيد. ويضره ابا زيد وايقن انه جوده قال:

شبيب الخيل لاقان ولقيته  
فرخ الباز لاقاه القطام

(١) لم يكن التتن "الدخان" موجودا على زمن الهالبيين.

ولاقيته كما ليل الظلام  
لولا السرج ياربعي رماني  
صارت بين الملطم والمثام  
تحت الديد من فوق الحزام  
رحيل ولا على الزرقا مقام  
فحنا على الزرقا بنينا الخيام  
مات شبيب. هنا عجوز رملا ما له احد وكاهله شبيب تقول ترثيه:

انتي ما دريتي بموت شبيب  
تقول نجوم الليل وين نغيب  
قضب مكان ابوه يوم يغيب  
عشاه من متون الرجال غصيب  
كما يصفى من الفرث الحليب  
يقول ابا زيد:

عجاج غشى البطحا وعج سرايح  
وصاح من البيدا ورا ذاك صايح  
حيرانها مثل النعام الطفايح  
وهذا يناديها بدرع وصفايح  
يريدون كسب المسمنات اللقايح  
صفاة نزت عن جملة البير نازح  
وصف الدلي ما بين ماتح ومايح  
وهو لاحق يبغى الثنا والمدايح  
وهو لاحق يبغى جميل الملايح  
والى الفلوم مع مضرب الرمح طايح  
الاجري في مداس الخيل طايح  
على هيكليات عراض الفطايح<sup>(١)</sup>  
والا على الاقبال صم صحايح  
وطريحننا تكثر عليه النوايح  
مهوجرة خوف الشنا والفضايح  
ذياب ابن غانم واللي معه فاتوا وقطعوا من هانا على الاخضر. ويلقون على  
الاخضر بنت عامر الخفاجي سراحة بشويهاته بصف الاخضر هالي عند شثاا.  
قالوا: من انتي بنت له؟ قالت: انا بنت الخفاجي عامر. الخفاجي حاكم بله قصر  
مروبع ما يهان، حتى المدفع ما يقواوه. قالوا له:

بيعي ارقاب الضان يابنت عامر يابدنا من فرجة ضاربينه  
يوم نزلوا وهم يسيرون عليه وهو يصك الدروازة عنهم، ذال منهم، ما يدري وش

لاقاني كما البحر واكبر  
ضربني ضربة احيه منها  
وضربني ضربة سلمت منها  
وضربته ضربة اوي ضربه  
كان اصبح شبيب الخيل حي  
وان كان اصبح شبيب الخيل ميت

ياشجرة الريحان وراك ناعمه  
فرقا شبيب فرقا الغيم من السما  
شبيب ابن شيبان شبيب الصخا  
له حربة ما ياقع الطير فوقها  
شبيب صفا عن الفاينات والردى  
عقب شبيب تطاردوا هم وبني صخر.

يقول ابا زيد الهلالي وما جرى  
وصاح من الرعيان راع مطرف  
وجا البوش يحدى جافل من معازبه  
هذا يلاويها وهذا يعنها  
انحنا واناخوا للطراد وعلقوا  
وانا على جملا لكن قطاته  
هشنا لما انه خاضت الخيل بالدماء  
ترى اول من دربيت خدني محمد  
وثاني من دربيت عبد بن نوفل  
وثالث من دربيت خضرا وزرجه  
ولا قط بكاني وهيض عبرتي  
ولا هالن الا سربة من بني صخر  
تراهن على الاقفا يشادن ضلع  
يردن على طريحنهن ياخذنه  
لكن سباياهم الى ما ادبرت بهم

(١) لم تظهر قبيلة بني صخر على مسرح الأحداث إلا بعد هجرة الهلاليين بقرون.

عقايدهم. ما حصل لهم وتيّه ولا كلام معه. قاموا جمعوا كل بنات الهلالات المزيّن  
منهن قالوا لهن: ياالله، سيرن عليه اغديه يفتح لكن والى فتح لكن عطنه اللي هو يبي  
وقولن حنا لك ما حنا عليك وانت خوي لنا ومرخص بكل حال تبينه منا. يوم سيرن  
عليه العصر وهو لك يفتح لهن ويدخلن. وعطوه حبة الهلايات الا بنات الامرا. وهو  
يحب وطفأ، اخت ذياب ابن غانم ويديري ذياب انه حبه، قال ذياب لاخته:

ياحيف يازمل ذياب ابن غانم يحط عليه من الخزا ويشال  
قالت:

يامل زرقا ياذياب ابن غانم ياكلن رقد الخيل من حس عامر  
ياكن رقد الخيل من حس عامر نهجت للعوب باطراف عربنا  
لقيت الجازي ام محمد تناوش مني ولد الخفاجي حبه  
وانا كما حمل مشظوظ بالعري اخبرك تسري لاطراف عربنا  
قال:

بذمتي وبذمتي وبذمتي ان حب المحب للمحب حلال  
قطنوا عند الخفاجي واجهة قيظ أو وقت صفري. الخفاجي شاف هالبنات المزيّن  
وهو يطير شوعه معهن، يطير قلبه معهن ونوى انه ينهج معهم، زين وحاكم وفارس.  
يوم نووا يمشون قامت امه، ام عامر، شويّله، جابت كسررين غنم، ذراعين مطبوحات  
قالت: دونك ياذياب ودونك يابا زيد كولوا حلالهن وعطون حرامهن. ابا زيد ملح  
الهبيره، كلاه، وطوح العظم وذياب كلى الهبيره ونقش اللحم اللي على سنونه وحطه  
على العظم وعطاوه اياوه. وتودع ولده عامر ذياب، صار هو وديعه تودعه ولده تقول  
له:

اودّعك ياذياب بويلدي حيث انك رجل من الرجال شجيع  
قال:

انا وديع له عن الضيم والظما وياقئ المنايا ما عنه وديع  
بعدين عاد يوم جاه علم ولده انه ذبح باكوانهم هم والزنا بتونس قصدت قالت:  
قالت شويّله يوم لم ابها النيا واشيب عيني والفرار وجميع  
هنيكم يامهتنين بنومكم ونومي على السلم وشوك نقيع  
لى واهني البدو يرعون مالهم وانا عيوني ما لها ربيع  
ياويلدي جيب المناعير فاتني كما فات ذود الممحلين ربيع  
ياويلدي من يوم انا حامل به اونس على كبدي كما شوب خليع  
واويلدي حاكم ثمانين قريه كل قرية به يشترى ويبيع  
يحدث على البيبان لا يغلقونه يخاف هتاش العراق يضيع

غدن به ثلاث من بنات آل عامر  
غَيَّا وريًا والرباب وزينب  
ياكن وطفا يوم اواقت مع الخبا  
هذي يلاويها وهذي يحبها  
طواغيت في دورهم. ويشلعون الهلالات. يوم وصلوا خضرا وتونس ويلقون  
الزرع والعشب مختلط سوا ويبنون بيوتهم ويطلقون الزمل يرتع. وياخذون تسعين  
ليله مقابلين الديره. قال الزناتي: انهج يالفيهاد -الفيهاد ترجمان للترك، هم ترك اهل  
تونس- انهج شف وشم ذولا ولا تحاكي الا اميرهم. يوم جا والى الناس جالسة عند  
حسن ابن سرحان، هو الامير، عم ابا زيد. قال الفيهاد:

ياراعيايات الزمل رذن زملكن  
يابدو وش جابكم من دياركم  
يغط على ابا زيد. يا مير الامير حسن، عم ابا زيد اكبر منه واستادب لعمه ما  
بغى يرد، بس يوم شافهم كلهم سكتوا، قال:

ثمان سنين ما هوى نجد قطره  
حنا جينا من اليمن للشام حوله  
قال الفيهاد:

لا هلا ولا مسهلا ولا مرحبا بكم  
قال ابا زيد:

جينا من الفقران فقران بيشه  
خلوا زملنا يرعى من زرعكم  
قال الفيهاد:

ياعبد يامامور يامنهي  
قال:

انا دبوسهم فوق روسهم  
قال:

هو انت عبيد جيتنا عام الاول  
قال:

انا العبيد اللي جيتكم عام الاول  
واللي تتبعني تسعين سربه  
قطعاننا يرعن بساتين تونس  
ويثورون خليفة الزناتي وقومه يعملون حفر على الديره، سنح جرف، كل يحفر من  
جهته داير ما دار على الديره، خنتق. ويقومون يدريون خيلهم تقمز هالحفر. يا مار  
خيلهم صارت تقمز الحفر وبني هلال خيلهم ما يقمزنه، طيبهن بالبر. وزود على  
الحفر عملوا لهم كلاليب لاجل الى قمزت خيلهم الزناتيه الحفر يحذفون هالكلاليب

بيض العواتق دلهن رفيع  
ومنهن بنت الهيشلي منيع  
شعاق شمس مع ذوابة ريع  
وهذي الى جت للفراش تطيع

ياهييه يالابسات العصايب  
هي فينة حظ والا شور خايب  
عم ابا زيد اكبر منه واستادب لعمه ما  
بغى يرد، بس يوم شافهم كلهم سكتوا، قال:

ولا جا هبوب يشيل الترايب  
سلام منا ياكرام الشوارب  
من اين جيتوا يالبيديوي الاخبارب

نبي نربع بالرياض العشاييب  
وان طالت القصرات صرنا صحاييب  
ورا سيدك ساكت وانت اللي تجاوب

فوق اشقر يدع السبايا حطاييب  
راعى السوالف والعلوم العجايب

حلكوك زيزوم البلا والحرايب  
ما يقطعون الراي يا صرت غايب  
يطيب لك والا على غير طايب

على خيل الهلالات اللي تطاردهم من ورا الحفر ويشتلونهم شتل مع حلاق الدرع، هالكلايب يستلحقون بهن الفارس اللي ورا الحفر، يخطفونه بالكلايب. يوم جا الصبح ويرسلون عليهم. قالوا نبي منكم ثلاثين ومنا ثلاثين يتلاقون بالميدان، الرّجال اللي طالع الشعر بوجيهم، اللي ينشب المشط بلحاهم، العَقِيل، نبي نتطارد بالفيضة على الخيل ويأسعد من الله معه. توامنوا على ثلاثين ثلاثين. ذياب ابن غانم له بناخي، سرور ابن قايد، بناخي له، هو خاله، وسرور هذا له سبع خوات عوانس ما عرسن، هم ما ياخذون البنت الا الى شافوا فعل ابوه او اخوه مع القوم، البنت ما توخذ ما زوله ما شيف فعل ابوه والا اخوه، ان كان فعله مع القوم به ربح ويفك السربه تخاطفوا خواته وان كان ما به خير هذا يدشرون خواته. ابو البنات، اللي هو ابو سرور، مطوع وبارن بناته لأنه ما هوب فارس بس يتوضى ويصلي، يوم بناته يقولن "كلنا بنات من قلة طعنك للمسرجات" واخوهن سرور توه صغير ولا بان له فعل. هكاليوم سرور اخته تفلية وتغورق عيونه بالدموع وتنقط دمعتة على خده. قال: وش بلاك يوم تبكين؟ قالت: عيني طاح به له سفاة. قال: علمين بالصحيح وشو هاللي حسك والا والله لاركي صدري على هالسيف لما يطلع من ظهري مقابل. يا مار يدري، مشتك. يوم لزم عليه قالت: ودي والله لو انت كبير وتطارد معهم. يوم تبرزوا بني هلال ويتممهم الصانع، صانع عندهم طيب وفارس، يتممهم الثلاثين. وهم يركبون بني هلال ويتولجهم سرور ابن قايد، الجذع، سرور جا يبي معهم قالوا: بيننا وبينهم عهد ما يطلع لهم الا الرّجال الملتحين اللي ينشب المشط بلحاهم، انت ما نشب المشط بلحيتك ياولدي وتوك. والاوه حاط المشط بمخباوه، امير خده وسكّه بلحيته والى مير هاوية سنونه باللحم، غرز سنونه باللحم يما نشب، امير اشتله، يوم شتله يا مير مقعيات سنون المشط غاطيهن الدم. قال خاله ذياب: ما ورا هذي خير، مير ياالصانع انت مخبور فعلك معنا ولا به بيس عليك وادري ان الهاللي ما هوب ناكس، مير انت انفهق على هلك. وامشوا هم، ثلاثين. يوم جوا لهم نبا هناك مكهب على الفيضة وهم لك اهل عشر منهم ينيرون لاهلهم، يوم قربوا لهم ذلوا، واهل عشر آخرين أوقفوا، أجدوا بالنبا بيون يشوفون من يذل خويّه، واهل العشر الباقيات طلقوهن عليهم، كدوا عليهم. ذياب و ابا زيد وسرور واللي عاد معهم، اهل عشر. وهم يتحاشكونهم. صار ابا زيد شماليهم وهذا صار من قبليهم، ذياب. وهم يدلون يعملون بهم عمل الذيب بالغنم، ما لحقوا ذبحوه، نجزوه. ويسوطهم ذياب، يسوطهم ويجدع بهم. يا مير ينخون لهم خيال اسمه وهق: وهق يابا العوايد! جسر وهق على تقريبة لذياب يوم شافه مشيح عنه، اصد باثر له سربة يطرده وهو يطلق عليه حبال الفرس وهو يضربه يا مار تكع على ركبه يوم انه دفعه، حيله وحيل الفرس، يا مار تكع على ركبه وهي تنزع. يوم نزع وتجدعه الى مار شاق ظلوعه، وهي تروح. انصفر ذياب ووقع وهي تكسر عليه قومه والى سرور، الجذع، واقف لهم بالركابات

يذودهم عنه، ينحاهم عن خاله، ومن جاوه زنده، بس يحوكره عليه، وهو يقوم يدير  
الفرس عليه وينحى الجموع عنه. وهو يحرج ابا زيد عنده لما صحى وقام. ولا غابت  
شمس هكاليوم الا خوات سرور كلهن مخطوبات يوم شافوا فعله. وهو يتمثل ذياب:

يقول الفتى الزعبي ذياب ابن غانم  
ولي حربة سميتها سم ساعه  
ربي بلانا بالخلا بالف فارس  
منا اهل عشر طلقوا لجم خيلهم  
اهل عشر ناروا، ذلوا ونكسوا، واهل عشر بس وقفوا يتفرجون عليهم.

ومنا اهل عشر تضرب الخيل بالقنا  
انا بقبلتهم وابا زيد شمالهم  
ينخون خيال وانا ما عرفته  
ضربني وهق وانا مشيح لغيره  
طاحت الخضرا وانا طحت وزنها  
راحت كما هرش يرتع بدله  
تسمع كشيش الدم من حمو مضربه  
سديته بدسمالي وثوبي ومثلحي  
حي والله هالمضرب.

الظنة انه من ابا زيد زنوه  
رفعت انا راسي من عقب سدره  
يعيش ياقرم ثنى دون خاله  
يسمعه ابا زيد، قال: وش تقول يا ذياب؟ قال: اقول:

حنا عصافير وابا زيد سدره  
ابا زيد ينحى من شمال وقبله  
العلام اللي عاهد ابا زيد ذبحهم، ذبح كل نوادرهم هكاليوم. ويذبح صبر، صبر  
ولد ابا زيد، والى والله حرج ابا زيد، واحد يجي من جنب واحد بس ابا زيد ما يقدر  
يذبحه حسب العهد اللي بينهم. ويشكي على هكالعجوز. قالت: انتم تعاهدتوا على  
الخيل او لا؟ قال: لا، على الارقاب بس. قالت: هو لا تعرضه، اعثر فرسه الى مريت  
من عنده ويذبحونه الهلالات. يوم مر من عنده ويلهب فرسه بشامان يا مودعه  
قطعتين. قال:

ابا زيد ياخوان عقرت سابقي  
والله لولا العهد بيني وبينك  
قال:

لك الله بالعلام ما نيب بايق  
ذبحت عيال الزغابا ثلاثه

بواق عاهد الله يا غدار  
لارفف مهرك بالجناح وطار  
ما بيننا والسابقات جوار  
وولد الخفاجي ما لحق له ثار

وذبحت صبر هو صبرة الحشا  
قال:

كان صيدك صبر والله ما عرفته  
مير جرنني سبق الخيل جتني  
كان انت لا تضفي ولا بيك جييره  
خذ السيف والدبوس مني هديه  
قال:

اهب يالعلام يا قو باسك  
اهب يالعلام وابشر بعمرك  
وفكه. اخذ ما اخذ ويبرى ذياب.

يزعجونه جنّب بالبل، ذياب يجنب عن اربعين خيال. يوم حسن يوصيه يقول:  
اودّعك بالبل يا ذياب ابن غانم  
حيور بالمرحان وسفن يا مشن  
ياما من حيد يقصر الشوف دونه

ويحمى الطراد بين بني هلال هم وايا الروم، قوم الزناتي، وذياب مع البل. وبيدهم  
الزناتي، يقول يا منه صاح جفّلن جفّل جميع خيلهم وتظهرهم وقام يجدهم منهم. يوم  
طلّعوا عليهم والى مير قوم ما له لا حد ولا رد. خضرا وتونس كله طالعه. ذبحوا  
عامر الخفاجي، ذبحوه الروم، وذبحوا سرور ابن قايد وذبحوا عيال الزغابا ثلاثة،  
بني خي ذياب. ويا مير ابا زيد ياخذ بهم شام ويمن لكن الى تلاقى هو والزناتي  
صاح عليه ذاك وتجفل فرس ابا زيد، تهرب به. ضامهم خليفه الزناتي يوم ابا زيد  
الهالالي يوصف هدات الزناتي عليهم يقول:

قدنا الخيل من سلمى إلى أجا  
كد جدعن الفلا في كل نقره  
اول خيلنا تاطا على صم الحصا  
وجينا الشام ولا علق عليهن  
وجانا شايب من فوق قبا  
أول هدة الشايب علينا  
وثاني هدة الشايب علينا  
وثالث هدة الشايب علينا  
ورابع هدة الشايب علينا  
وخامس هدة الشايب علينا  
وسادس هدة الشايب علينا  
وسابع هدة الشايب علينا  
وثامن هدة الشايب علينا

وحطيت بكبدي وقيدة نار

من الغيظ ما عدى علي نهار  
رجال حماقا ويدعون بثار  
يوم دنا ما يزود نهـار  
من قبل انا اذبح يوخذن جهار

لو هي بغيرك كان قلبه طار  
عك اليمين الطايلات قـصار  
يبرزونه ويداوونه لما بري. يوم بري وهم  
يزعجونه جنّب بالبل، ذياب يجنب عن اربعين خيال. يوم حسن يوصيه يقول:

وصاتين ما هيب بس وصاه  
وكرام يا شح البخيل بماه  
تسري وتصبح يا ذياب وراه

ويحمى الطراد بين بني هلال هم وايا الروم، قوم الزناتي، وذياب مع البل. وبيدهم  
الزناتي، يقول يا منه صاح جفّلن جفّل جميع خيلهم وتظهرهم وقام يجدهم منهم. يوم  
طلّعوا عليهم والى مير قوم ما له لا حد ولا رد. خضرا وتونس كله طالعه. ذبحوا  
عامر الخفاجي، ذبحوه الروم، وذبحوا سرور ابن قايد وذبحوا عيال الزغابا ثلاثة،  
بني خي ذياب. ويا مير ابا زيد ياخذ بهم شام ويمن لكن الى تلاقى هو والزناتي  
صاح عليه ذاك وتجفل فرس ابا زيد، تهرب به. ضامهم خليفه الزناتي يوم ابا زيد  
الهالالي يوصف هدات الزناتي عليهم يقول:

ليا عرنان منقاد الهضاب  
وراحت ققل مثل الذياب  
وتالي خيلنا ياطا التراب  
جعل الشام يبلى بالخراب  
كالشوارب سبق العقاب  
ميتين من غض الشباب  
حسبنا وضيعنا الحساب  
خلى خيلنا شت وذهاب  
أخذ الركاب مع الزهاب  
خلانا جنب والعباة جناب  
رحنا مثل مطرود الكلاب  
راحت خيلنا مثل السراب  
عفنا الاكل مع حلو الشراب



وتاسع هدة الشايب علينا  
وعاشر هدة الشايب علينا  
واثنى جوادي من وجودي عليه  
وفضينا ديرته غصب عليه  
والزناتي يحذر ولده من نطحة ابا زيد يقول:

حذرا عن اللي كفية القدر وجهه  
ابعد ما يبعد حذفة العصا  
ينهد انهداد الما وينسد انسداده  
لى جا يمين الخيل صر مع شماله  
واسرع من طحن الرحا وانفتاله  
ويشدى دبس واقع من جباله  
جنب ذياب مع الدبش والى عجوز له جميل ما له غيره. قالت: يا ذياب، جملي هذا  
تروه وداعتك. والى امرحت البل بالخلا جمعهن ذياب زبرة جميع وقام عقد له غصن  
طلحة هاللون وقام يسحبه داير ما دار عليهن يما يغدي الاثر عقب الى جا الصبح  
ركب واستدار على مراح الدبش يشوف لو به جرة بعير منطلق والا مسروق بالليل.  
يوم جا هكاليوم والى مير هذا اثر الرجّال سايق جميل العجوز ومطلعه من البل  
وناهج به. وهو يتبع اثره يقصه. يوم طلع بعض الطلعات يا مير يشوف خرايب  
هكالدويرات وشاف بهن مره وينحره. يوم وصله وتطلع عليه قالت: انت وش انت  
ياولدا؟ كان انت انسي فانت زين عمرك تراوه سعلواني هاللي عندنا هذا مسعور  
ياكلك، اكل اهل هالدويرات وخلان انا مرة له ولكن ان تطاردت انت واياوه لا تضربه  
الا مع هالمضرب البيّن وان ضربته معه تراوه ما يحيا وان ضربته مع غيره ما يموت.  
قال: وين هو؟ قالت: شفه يم العين هذيك يشوي جملك. السعلو هذا يوم اخذ الجمل  
اثره شب له نار وذبح الجمل وجدّ عراقيبه وفرثه وشواوه، كله غمته بالنار وشواوه.  
فرس ذياب، الخضرا، لقحة توه خامشة اللقاح. قام حوّل عنه وسدد مناخره واذا انه  
واحزمهن ذال تسمع حسه تنخرع، ذال من خرعة الفرس والا هو ما هو منخرع. يوم  
قرب للسعلو تنحنح السعلو اح اح اح، قال: عندنا ريح سنناس هو من الجن والا  
من الناس؟ وهو يطلع الجمل شاويه بالنار قال لذياب: افلح، افلح. امير خذ ذياب  
قطعة منه، بس لقمه وحده، امير كله، قال: ودايعنا ما ناكل الا كبوده. يوم بحر يا  
الخضرا رامية مهيرته تحته، لقاحه، انخرعت بس يوم سمعته يتنحنح. قضوا يوم  
قضوا قال: يالله نبي نتطارد. والى مير ركض الخضرا اللي تحته تقل ما به بركه،  
لحقه الحصان، متقفية عند قطاته. يوم ايقن انه بس اللي ما هو يدلي به، يزرقه  
بالرمح، وهو لك يسقط مع شنق الفرس من هنا الى الضربة فايته. وهو يلحقه  
ويضربه والى شاك علباوه وعلبا الفرس.

تطاردوا هكاليوم وتصير هكالنهار كسيرة على بني هلال. وهم يقومون لك على  
ابا زيد ويطرحونه ويحدّونه، يكتفونه، ذالين عليه، ما يخلونه يحارب، خافوا يذبح،  
مودعيه نخيره، ان راح ابا زيد تروح الدنيا كله<sup>(١)</sup>. يوم طالع الرجّال يحاربون قال

(١) انظر ما فعله الأسلم مع ضاري ابن طوالة تحت العنوان الفرعي "كون ابضه بين الاسلم بعضهم مع



واللي ذبح عنده ثمانين ملبس  
كلهم شيوخ.

حطوه في حزمٍ على نر الخيالا  
كم خفرة ميّعت الشمس نهدها  
منهن بنتك يا ذياب ابن غانم  
تاصل الى قبر الخفاجي وتنثني  
بنات الهلالات عيّن عامر الحفاجي. قال:

لا هلکم لا بلکم وابل الحيا  
العن قوم ما ثنوا دون جارهم  
يقطع نجوع ما ثنت دون جارها  
تعطى ذهاب الدار عقب اعتمارها  
قال:

ياسيدي يا عرصة عند عامر  
تسعين رمح قصمن دون عامر  
وهو يوثب لك عليه رجلي، على الصانع. يقول امير اخطف سبب الفرس وينفرط  
من يده، الصانع يوم يدهن ذيل الحصان بالودك ذال من ذي. ويمر الشلفا ويخطفه  
ويلوح على الفرس بحديده ويلحق الصانع وهو يزرقه بالشلفا، يحذف الصوينع  
بالشلفا والى هي مغترّة بله صفاة، أخطت الصانع. قال: اترّب. يقوله الصانع، على  
ان شلفا ذياب ما توقّع الا بلحم. قال: احفرها. يوم حفر الصفاة والا هي باعجة لها  
ضب وحيه تحت الصفاة. هو حالف دين ان ما صارت هواتي بلحم ان كود اقص  
يدي. قال للصانع: حلّ الزناتي لي، وشلون شكله؟ قال: حلاياه حلاياك يا ذياب  
يوم يصبح مثل القعود المشذر  
ويوم يمسي يا تقل عقاب فلاه  
قال:

اطارده وانا ذياب ابن غانم  
ذياب وهو جناب مع البل جاك من خلاوه بخلاوه ويحفر له زبيه ويخلي فرسه  
الخضرا تطمر من فوقه غاد وجاي، غاد وجاي، يدرّبه تجمح مثل فرس الزناتي. يوم  
وصل هله ذياب والى هذي البنية الصغيره المرسال اللي هو بالعادة يرسل لهم  
الزناتي وقومه. بنت صغيرة زغريغة توه ما اشتهدت الرجال. قالت: ابوي يقول يطلعون  
جينا هم. يخبرون عملهم بهم اول وهم ما دريو ان ذياب جاي من معزابه مع الدبش.  
امير اخمشه يا ذياب وخطه بحضنه وحبه وبطط شعر شواربه براطمه وقامن يبشّن دم  
وقام الدم يشوخب منهن وملّى هدومه. قال: حيك حيك، سميّ الذيب يذبح ابيك. يوم  
رجعت لهم وشافوه تخرعوا، قالوا: هاهنا نذبهم والا يذبوننا. قالت: لا بالله الا  
يذبونكم. وعلمتهم باللي سوّى به ذياب واللي هو قال له. يقولون ان الزناتي سمّ،  
محشومين الرجال. يا مير هو حالم ان اللي يذبحه ذياب. قال: هذاك اللي ايتمك كان  
الله ايتمك. جا ذياب هله قال لبنته الصغيره: عطيني الثوب. هو يبي الدرع وهي عطته  
ثوب الخام، تحسبه يبي الثوب اللي يلبسون خلق الله. اخذ الثوب ما رده، قال: خذ

فألها من طفالها، صارت خيرةً له. ويركب ذياب ابن غانم ويجيك وياخذ له سبع حُدجات ويحظهن في حثل الثوب المروذن وشلفاوه معه وطق الباب على الزناتي نصف الليل. اطلعي عليه الصفيرا قالت: من عند الباب؟ قال: غلام يدور اللعاب. رجعت لابوها قالت هذا وما يقول. قال قولني له نصبح ويصبح على خير. وهو ترجع قالت يقول ابوي يصبح ونصبح على خير. قال ارجعي له قولني خيال بيبي الطراد. طلع عليه الزناتي قال: انت ذياب ابن غانم. قال: ما غيره. وهو يركب فرسه وهو يجي حاديه. ويظهرون للميدان. هذا وقتهم اللي هم فيه، هالشكل! يوم تشاموا، والى الزناتي خيال، ما له ملاقي، يا صاح جفلن الخيل. يوم شاف ذياب وهو يقيف. يوم وقف وهو يصيح، على خبره قبل. بالاول يتلاقون هم وبني هلال ويكسرونهم بني هلال لين ياصلون الحفر، إلى وصلوا الحفر ينكسن خيل الهلالات. الزناتي يوم نظ الحفر وتثالث فرس ذياب، الخضرا، وتنط الحفر عطية الله. قاموا يتماوحن ذياب والزناتي وحذف الزناتي عليه الكلاب مشع الثوب، قره ولا جدعه. الكلاب يشتل الدرع وذياب ما عليه درع، ما هيب بنته عطته الثوب بدال الدرع! هذي قولته: خذ فالها من طفالها. ويقومون يتطاردون تحت القصر. ذياب يستطرد للزناتي وكل ما رد الفرس وانحاش الزناتي حذفه بالحدجه ووقعت بين كتوفه. قال الزناتي: خيال ياوي خيال لولا ان شلفاوه دائر. يحسب الحدج هن شلفا ذياب. ذياب يرميه بالحدج بيبي يمه، ويبي بعد يطول الطراد علشان يشبع طراد. يوم غلقت سبع الحدجات وهو يسحب الشلفا ذياب، تبرق. قال الزناتي: كريم يابرق بغير سحاب. قال ذياب: ما غير شلفا بيمين ذياب. شلفا ذياب صاقعة طايحة له من سحابه وحافرها وطرقها ولبسها على الجب. ومن الصبح الين تالي النهار وهم يتطاردون. يوم واقت الصفيرا هي ومرعي وشافوا اللي يتطاردون تحت القصر ما عرفوا ذياب، صوتوا له قالوا:

وقع نبي نَشْدِك يا شايح النبا      عن الخيل جتنا اليوم موم شليله  
قال:

ما غير فارس الخضرا ذياب ابن غانم      حامي سباق الخيل مومي شليله  
ولا سمعوا جوابه قاموا كروا عليه ينشدونه:

وقّع نبي نَشْدِك يا شايح النبا      عن الخيل جتنا بالعيال شرود  
قال:

ما غير فارس الخضرا ذياب ابن غانم      ترى الشوف خزر والكلام يكود  
غابت عليهم الشمس وهم يتطاردون تحت القصر، الزناتي وذياب ابن غانم. يوم اظلم الليل وهي تقوم الصفيرا تشلع الضوا تبي تشوف لون مصلخ ذياب هكاللي مثل الجمل الاوضح، مصلخ هم ما عليهم الا الدروع، والى مير هو متوهل ابوه. يوم انه حذف الغوج عليه ويزرقه على ضوح الضوا وهو زين الباب وعلى ما وصل الباب الى هو لاحقه الحصان، ما امداه، وهو يزرقه بالشلفا الى شاكته، يا واسرته للارض، قامت تلوح من بين كتوفه مثل ذيل الجربوع. ضربته الشلفا مع العتيرا

والى شارحة بغاقتة. جا يبي يفصل به، يذبحه، قال: اقهر، اقهر ابعلّمك. هو قبل يجون الهلالات حالم ان السما تمطر شوك نيص، ضرنبون، وهالحين دري ان تفسير حلمه هو جية الهلالات وان شوك الضرنبون رماحهم وسلاحهم. قال:

نفس الفتى لا بدها من زواله  
ثري رفيف العين ناوي زواله  
ترمي بعيدان البلنزا خياله  
سيوف تلطي في يمانى عياله  
بيمجنب البطحا وبتوا حاله  
لهم رباغ شاق عيني ظلاله  
له حربة تحت العجاج اشتعاله  
مصقولة سم الافاعي صقاله  
ما بنت الافان ابوها دلالة  
واثر عبيد القوم حامى ثقالة  
يجر القنا جر السواني حباله  
يا هد تعطيه السبايا كفاله  
يا جا جنوب الخيل صرنا شماله  
بسيف ذياب كد لبا زيد ازاله  
وجيه العذارى طلقته رجاله  
صغار اللحى شبتوا بقومي فعاله  
هني نفس لا عليها ولا له  
بروس الشعاف اسرح وارضع صخاله

يوم خلصوا من حرب الزناتي واجتمعوا بيون يمضون لبا زيد انه اميرهم، وكلهم امضوا له وحط له عمود اللي ينجر من تحته مثل العهد وانجروا غير ذياب قص العمود قال: ما زاد من هذا نقصره بهذا. قال: انا اللي ذبحت الزناتي وخلصتكم منه، انت ما تومر علي يابا زيد. قال ابا زيد: والله انك ما تنقل السلاح غير ما نقلته. وجرم عليه لبس الثوب الابيض وشيل السلاح. جا العيد وصار عندهم طراد خيل يوم العيد. قام ابا زيد يتطاردهم ولا جاز له لعبهم. قال: خلوا ذياب يجي اتطارده انا واياوه. راح ذياب لهكالصانع وقال له يزين له قرطه. ذياب شال القرطه حطه تحت هدومه وقام لك يطارد ابا زيد. يوم تقفأوه هكالنوبه وهو يسحب القرطه وضرب ابا زيد وذبحه، القط ابا زيد بالقرطه يا قاطع راسه. يوم قطع راسه قال ابا زيد يوم اوجس الموت:

ومن عند حلقي تقل لقم زاد  
يبيد الفتى واسمالهن جداد

يقول الزناتي والزناتي خليفه  
ثمان سنين وعيني ترقني  
حلمت ناشي من الشارق مزنه  
مطرها الصبايا والسبايا وبرقها  
واشيب عيني من عريب تنزلوا  
بتوا بيوت العز بيكل مقرح  
ما شاق عيني كود ذياب بحربته  
مشريه بحققة ولقييه  
خان الصفيرا يوم خانته بابوها  
تشير بربط القوم واطلاق عبدهم  
واثر عبيد القوم زيزوم سربه  
ثاربه امير ولد امير مجرب  
شيخ على له عندل بنت عندل  
لولا بخط الرمل شيفت منيتي  
نظرت بقومي نظرة ما تسرني  
كبار اللحى لا بارك الله باللحى  
يالييتني ما كنت شيخ لقابس  
يالييتني راعي معيز خلاوي

يوم خلصوا من حرب الزناتي واجتمعوا بيون يمضون لبا زيد انه اميرهم، وكلهم امضوا له وحط له عمود اللي ينجر من تحته مثل العهد وانجروا غير ذياب قص العمود قال: ما زاد من هذا نقصره بهذا. قال: انا اللي ذبحت الزناتي وخلصتكم منه، انت ما تومر علي يابا زيد. قال ابا زيد: والله انك ما تنقل السلاح غير ما نقلته. وجرم عليه لبس الثوب الابيض وشيل السلاح. جا العيد وصار عندهم طراد خيل يوم العيد. قام ابا زيد يتطاردهم ولا جاز له لعبهم. قال: خلوا ذياب يجي اتطارده انا واياوه. راح ذياب لهكالصانع وقال له يزين له قرطه. ذياب شال القرطه حطه تحت هدومه وقام لك يطارد ابا زيد. يوم تقفأوه هكالنوبه وهو يسحب القرطه وضرب ابا زيد وذبحه، القط ابا زيد بالقرطه يا قاطع راسه. يوم قطع راسه قال ابا زيد يوم اوجس الموت:

اوجس من راسي عظام تحدر  
لى ياهلي حطوا علي ركز الحصا

## الضياغم

الضياغم هم عيال ضيغم كلهم. شهوان وراشد هذولا اخوه عيال ضيغم. شهوان عَقْبُهُ عرار وراشد عَقْبُهُ عَمِير. عَمِير اللّي عَقْبُهُ السرحان هاللي بقارا، الوديعي والشرعان والجلال، هذولا اللّي عليهم السرحانية، والباقية تسرحنوا. مبتدا سالفتهم امحلت ديرتهم بالجنوب وَنَزَحُوا للشمال، يوم شهوان يقصد يوصف رحلتهم يقول<sup>(١)</sup>:

قال شهوان ومن راس ماله  
لنا منزل ما بين الافلاج والحسا  
وميرنا كبار النوادي من ضروعهن  
والى حافهن سبع الخلا بات جايع  
حيرانهن.

الى حودروا يبغون الاسعار بالقري  
باسباب ضيقات الزمان من الجفا  
نرعى بها دمدم هشيم هامد  
وتخلى نجد كود ابانات عقلا  
الفين ورد الما مع الفين صدرها  
غوارفه تسعين جلد لقيه  
ياجاهاهل ترى بمحنى المر  
تراها بشعيب الشري ياجاهل بها  
درنا عليها الخيل لين هدمته  
تضيع المعالم بالزمان وتنقرض  
اقولها لاجيال من جا بعدنا  
خفنا عليها من شحاح زلايب  
تمنيت من حطمات الليالي لعنا  
لى صار ما جود على حد حاجه  
وان صار ما لك من ذراعك نجده  
يامهرة عند الصويتي لكنه  
نسل الاصايل ما تبور عموقها

يوم كبروا عرار وعمير صار بينهم مقاطع، تقاطعوا الله لا يبلانا وقاموا يتزاعمون على الشيخه. عرار طويل ومزيون ونظر وشجاع وعمير مربوع. عمير معه فكر وهداك شجاعة بلياً فكر، انت يا عرار، مع انه بخيل وعمير كريم. عمير ياصل وهداك يقطع الله يعافينا. وحایل عمير يا مير ما يجيه مع باب، أنت يا عرار، يحاول بيبي يتبره يا مير ما يجيه مع باب، كل ما منه سمح هذاك. عرار من يوم هو ببطن امه

(١) وهي تتداخل في الوزن والقافية والمنحى العام وقائمة الأماكن مع قصيدة مماثلة ينسبها الرواة لبني هلال.

وهو مبين عليه القشر، ما هي امه تقول:

الى ياولدي من يوم انا حامل به  
حسبت له اربع سنين مع اربع  
الى احترك من مجلس صوب مجلس  
لى كن ذباب السيف من فوق متنه  
يااتقل شيهان ببطني مخامر  
مع مثلهن نبدي عليه السراير  
له العذارى فتحن الغراير  
جناح نسر من على الجو طائر  
حاي لهم عرار، حاي لهم، والى الضياغم راكبين عمير، بين الحلا وبين الصخا.  
هذاك بس شر منزل، عرار. تحاربوا بيناتهم عمير وعرار وهم عيال عم وعرار أخذ  
عميره اخت عمير وعمير أخذ ميثا اخت عرار. عميرة مع عرار وميثا اخت عرار مع  
عمير. كل واحد اخته مع الثاني وعيال عم هم. عمير اخوته اربعة عقيل وحصن  
وحجاب وحميدان. عرار له اخو اسمه فارس، فارس اخو لعرار من الابو واخو لعمير  
وعميره من الام.

سبب حربهم أوله على انثى، بنت عم لهم، بنت عم لهم بعده واحد عنهم ولا واحد  
يقدر يحيره عن خوييه، والكل منهم يبيه وهي بعده واحد عنهم. قال: يا عمير حنا ما  
حناب متكاربين على الانثى هذي، روح يمه وان بغتك والله ما أنكفه عنك. قال: وانا  
بعد كان هي بغتك والله ما أنكفه عنك. قال: زاد روح يمه. قال: سلّف انا هذا وراك.  
تلبس انت يا عرار، ولد مزبون ونظر، ومشى يمهم. جا بالببيت وجلس عندهم. عمير  
خلأوه يما قعد. يوم قعد جاب الفرس ومعرقه ولوح فوق الفرس وجاك يهدب على  
الفرس. أوقف على الفرس، قالوا: حول! قال: والله ما انا محول، انا جاي لكلمة ابيه  
ولا انا مسير. قالوا: حول! قال: ابد، ما احول، انا جاي لكلمه، لفلانه اللي متناحين  
عليه انا وايا ابن عمي، اذا انه تبيه فانا ما والله انكفه عنه، تاخذه، وان كان انه تبين  
انا ما تبيه هو بيننا ميثاق انه ما يتعرضه. قالت: ما انتب محول؟ قال: لا. قالت:  
ياخوي انا خريزة خيال ما انا خريزة رجلي. هو على فرس وهداك رجلي. وهو  
يحرف فرسه وهو ينكس. هذاك تار. لقط على عمير بسبب دبرته هذي.

هكالحين، هكالزمان هذاك الصحون اللي يقلطون به الطعام جوزيات خشب. والى  
مير جوزية عمير مسبته وجرده وهدك جديدة تلهوق، بيضا تقل نجمه. قال: انا  
جوزيتي اطيب من جوزيتك. قال: هاتهن للرجال يفرقونا. هذا عمير نزل به له لقيه  
من البل وفراشه عيش وصب عليه من هالسمن لما قامت تشوخب من هنا ومن هنا،  
وهذاك جابه يدوده. قال: ايهن احلى؟ قالوا: لا والله الا اللي به اللقيه احلى. يا والله  
يوم انقلب.

جوا هكاليوم وهم يجنبون مع الدبش. قام عمير حفر له زبيه، حفرة كبيره  
وقعيره، قال نبي نطه، نقمزه انا وانت يا عمير واللي يطيح وسط الحفره يذبح حدى  
نياقه جناه يعشي عليه الجنب، جنب البل. على ان عمير قصير وقمزته قصيره وانت  
يا عرار طويل وقمزته طويله وهاقي انه يبي يغل عمير. عرار قمز الحفره وعمير طاح  
بوصطه وذبح لهم الناقه. يوم ذبحوا الناقه وصلخوا جلده وقطعوه وبدوا يطبخونه قام

لك عَمِيرٍ ويتحيزم ويركض ويقمز والاوله ناطُ الحفرة، نطّه ما طاح. قالوا الجنب: وش  
الله اوزاك تجدع روحك اول بالحفرة؟ حنا نحسبك عجز لا تنطّه. قال: لا والله ما نيب  
عجز، ولا لي مقصد الا اني شفتمك عيمانين على اللحم وتعمدت اني اطيح علشان  
اذبح لكم والغمكم. وينغلب عرار ويفتشل.

ذبحوا الجنابة بالخلا وطبخوه قام عرار وحط الصحن بله سفره، أخذ الغدا يوم  
ولم بله سفره وعلّقه بله شغروف طلحه، الطلحة اللي هم يقيّلون تحته قدام الدبش،  
عَمِيرٌ قصير وهذاك طويل، ويعلّقه براس الطلحه، السفره. قال: كولوا ياطوال  
واقمحوا ياقصار. يقوله عرار. على حسب ان هذاك قصير يبي يضحك عليه غديه ما  
يلحق ياكل. ثاروا يوم ثاروا، نَضُوا، يامير عَمِيرٌ يوم وقف واللي مثله وقّفوا. أخذ  
السيف عَمِيرٌ وهو يضرب الشغروف لى هو قاصه. قال: ادير قصري ببصري  
بفرستي، ما طال من ذا نقصره بذا وعاداتنا قصر الطالين، كولوا ياقصار واقمحو  
ياطوال. طاح الغدا بالارض وجلسوا عليه بسفرته وتغدوا.

كلا الجنابه وبقي الصفي، صفي المرق بالقدور. عَمِيرٌ عليه له جوخه. ويخليه  
عرار يما نام، وهو يثور عرار ويأخذ هكالمشهاب ويخرق جوخة عَمِيرٌ. عَمِيرٌ واعى  
ويشوفه مير مسكت. يوم نام عرار وهو يثور على الصفي وهو يقلاوه على النار يما  
دلّى يغلى ويقضب رمّة الحصان وهو يركسه به، حصان عرار، مشهور، ركسه  
بصفي الدهن. وهن يكشرن براطمه وسنونه طالعات هاللون، براطمه كلاهن الودك.  
يوم جا الصبح قال أمنا بالله هو هذا رغبة بك يا عَمِيرٌ هاللي مخرق جبّتك النار؟  
يعني كثر اكل. امير قل هاك كنه ما شافه: انا لله هذا شي اضحك مشهور. ويلتفت  
عرار على حصانه يا كاشرات سنونه. قال عرار:

لى هب يوم يطرف العين برده نَشِدٌ وبيايام السعود نقيم  
قال عمير:

لى هب يوم بارد نَسْتَزَلّه تراك على باقي شقّاك مقيم  
يا مير يوم وصليّه. الثمرة انهم افترقوا. ثاروا تطاردوا على الخيل، تطاردوا  
وتفرّقوا. انقسموا الضياغم بينهم، قوم مع عرار وقوم مع عَمِيرٌ، كل راح مع اللي هو  
يبي. تقاوموا وقاموا كل يوم يعسم الطراد بينهم. واوداهم عرار على حصانه  
مشهور، اذهبهم، يلحق الخيل ولا يلحقته. ويبون يشبّون خيلهم من هالحصان  
علشان يجين مهار مثله وهو معي يسمع لهم. بغيضه وجابت بنت، هو طبعه اقشر لا  
عاد هذولا عدوان. قالوا لمرته عَمِيرٌ، اختهم، وشلون نخليه يرضى علينا ويحاكيها.  
قالت لعَمِيرٌ: اقعد بجنبه وهو يصلي والى صلى وقضى وسلم قل: عليكم السلام.  
وسووا من ذا عينه لكن هذاك دون روحه، ما رد السلام ولا طاعهم يشبّون خيلهم.  
قال عَمِيرٌ لاخته: يا عَمِيرٌ، الحصان هذا ما لنا به حيله، وش الطريقه نبي نشبّيه  
خيلنا؟ حنا حظنا مطول. قالت: وعدكم فيضة النعمان. واعدتهم بالفيضة. هي له عاده



كل ما امسى الليل يا والله الحديد بيد والعليق بيد، تُعَلَّقُ على الحصان وتحدده. وهو على العاده كل ما امسى الليل ينشده: انتي علقتي على الحصان. تُرَكِّتُهُ هكالليله ما علقت عليه، اللي هي ليلة الوعد مع اخوته. قام الحصان يلوج ويرهم. قال: علقي على الحصان يا عميره! قالت: هالحين، ما انا قادره. خلته. قام يلوج ويرهم الحصان. قال بزعل: علقي على الحصان يا عميره! ثلاث مرات يردّه عليه. قالت: ياشين ابلشتنا انت وحصانك عساوه للتبر انا هالحين ما انا قادره، عسى ما يحدد بفيضة النعمان. فيضة النعمان اللي هي مواعده به اخوته. قال: ار اخوميثا، علي دين انك الا تقودينه هالحين ولا تعلقين عليه الا بفيضة النعمان. هي هذا اللي هي تبي. هي عارفة انه رجل حار والى هزبته هاللون انه يبي يجير عليه الا تحده بفيضة النعمان، هي عارفة طبعه. وهي تلوح عليه وتهذب. يوم جت الروضه والى اخوته اربعه على اربع خيل ومعهم الصانع على فرسهم الخامسة. قالوا: يالله حيه، حولي، حولي. قالت: لا، والله ما احول الا تعاهدونن ان الله جاب لكم من حصانه طنو انكم تعتقونه ثلاث وليايه، تالونه على بنات حصانه ثلاث نوبات وتعتقونه. اعطوه ميثاق وحولت عن الحصان. الحصان ما جا الصبح الا هو شاببي خيلهم كلهن، الخمس كلهن شباهن. الخامسة عجز ينزي عليه وطاحت شهوته بالارض وقاموا حطوه بقطنه ويجحرونه بظبية الفرس. لقحن الخيل وما حال الحول الا وهن والداد خمس فلا، الخامسة اللي اجحروا به القطنه بظبيته صار به له شامة بيضا على شنق القطة.

عسّفوا المهار، يوم عسّفوهن وهم يغيرون عليه. يوم اغاروا عليه وهن يلحقتة مثل رفيف القطا، يلحقن ابوهن، حصان عرار اللي تحته. الى اولهم عمير وهو يمشق السيف من فوق راسه وهو يهوزه، قال: والله يالولا لولا. يعني العهد اللي هو يخبر، يوم يعاهدون عميره انهم يعتقون عرار. وهي تصوت عميره لعرار قالت: اركهن على الكالول، على الحزم. ما تبيهم يذبونه. وهو يركيهم على الكالول ويطلع به مشهور عنهن ويعتق. تهول عرار، قال: وش النجوم هذولي، من اين جنهم هالخيلى؟ استشك. تفتن، فطن، قال: وكاد هذولي بنات حصاني يوم هي تنهج به هكالليله لفيضة النعمان. وهو يجيك خبتان باله، زعلان. جا وجلس عنده، اخذ له شوي، قال: يا عميره نبي نلعب السطرنج ونبي نتقاصد انا واياك، ابيك تقصدين علي واقصد عليك، نتراد بالقصيد. يبي يستطلع، يستقره. قالت: ياخي شف الضياغم بهالمجلس كلهم قواصيد، رح يمهم، اللي انت تبي منهم تقاصد انت واياوه. قال: لا، انا جاي على بالي اتقاصد انا واياك. قالت: ما اتقاصد انا واياك الا كان انا بوجه فارس. فارس اخو لعرار من الابو واخو لعمير وعميره من الام. قال: حطه بوجهك يافارس. قال: انت قليب جوخا ما ينتفحج عليه يا عرار، احطه بوجهي ان عاهدتن، عاهدن واحطه بوجهي. قال: عليك الله وامان الله عن يدي وما نقلت. هو قاعد وهي مناوحتة. قالت: توكل على الله العب، ما لحيه قديمت على شارب. ويلعب هو وهو يقشطه، تقيشطت له

هي. قال:

الخيـل يـامـشـهـور والـخـيـل جـرـدت  
أنا كـما حـر عـلى راس مـرقـب  
حـصـانـي عـذاب الخـيـل يا صـار طـارـد  
قـالـت: خـف اللـه بـنـفـسـك، كـيـف تـشـبـه  
كـدرـي القـطـا. قـال: الشـاعـر عـلى هـواـه. وـهـم يـلـعـبـون وـهـي تـقـشـطـه. قـال لـه: المـثـؤبـه،  
رـدـي عـلـي. قـالـت:

قـالـت عـمـيـره بـنت مـن يـمـنـع التـلا  
قـيـلي حـثـا حـيـث القـبـايل رـحـايـله  
يـعـنـي ان المـراكـيب اللـي يـحـثـون الـانـضـا يـغـنـون قـصـيـده وبيـن ما رـاحـوا و تحـفـظـه  
النـاس.

قـيـلي لـيا ما هـذ في و سـط مـجـلس  
(مـير) عـزـيل راعـى الغـوج وان لـحـقـن اربـع  
الخـامـسـه اللـي بـه الشـامـه، عـكـوتـه، قـطـاتـه طـخـما، بـيـضـا. و هـي تـسـكـت، عـطـتـه عـلى  
قـدر بـيوتـه، بـس هـو عـاد تـيـن لـه طـرف العـلم وبيـغـى يـتـوكـد. قـال: مـن عـلـيـهـن؟ قـالـت:

عـلـيـهـن بـلا جـهـلا عـمـيـر ابن رـاشـد  
اخـوي اللـي مـا جـابـن البـيـض مـثـله  
اخـوي اللـي عـزـى الجـنـين عـن امـه  
قـال: قـولـي عـن حـلـايـله. قـالـت: الشـاعـر عـلى هـواـه. قـالـت:

الـي هـبـت النـخـبا و قـل وابل الحـيا  
مـحـتـي خـشـوم الفـوس مـن شـمـخ الذـرا  
يـوم و لـيـل مـن دـخـاخـين مـيـره  
يـذلق ذبـاب السـيـف و يـمـشـي مـكـنـهـس  
مـا غـيـل الـا غـيـلنا يـال رـاشـد  
الصـبر مـفـتـاح الطـيـب و مـن بـغـى  
حـنا اللـي نـكـتـال بـالصـاع و افـي

يا مار معاهده انه ما ينهض يده عليه. يقول وهو ياخذ هكالروة يدعسه بافمه  
وهو يئبره بلسانه يا قاصم سنه. قال فارس لآخوه: جالي ما انت حاطه بوجهي، ليه  
تقطع وجهي؟ قال: انا عاهدتك عن يدي وما نقلت وان كان انك زعلت طس ياعلك من  
ورا عين الدقيق وقابس. وزعل فارس ورحل يم الدقيق وقابس. عميره صرت سنه  
بطحين وارسلته مع صليبي لآخوه عميره<sup>(1)</sup>. راحوا عرار وابوه شهوان غزو. يوم دري

(1) وهذا ما حدث أيضا مع اخت سليمان ولد دعيج جد الشلقان الذي ذبحه حقروص حينما بعثت  
خصلة من شعرها لأخيها سالم بالغريبيه. انظر سالفتها تحت العنوان الفرعي "الشلقان: أنسابهم  
ووسومهم وشيوخهم وسبب التسمية" ضمن العنوان الرئيسي "الشلقان". وهذا ما حدث أيضا مع  
سلمى المداويه حينما بعثت خصلة من شعرها لعبكلي ابن ثنيان الذي كان في الأحساء. انظر سالفتها  
تحت العنوان الفرعي "فرعة الزميل من الحسا لسلمى السعدية المداويه" ضمن العنوان الرئيسي

عُمَيْرُ ان عرار وابوه شهوان غازين والحريم مغيبات وهو ياخذ الصانع معه ومعهم قاز اللي يقلعون به السنون. يوم جوا حريم عرار قال عُمَيْرُ للصانع: ياالله مطبّ ثنية عُمَيْرِه سلّه منهن كلهن. وهو يمكع من كل وحده سن عن ثنية اخته عُمَيْرِه، مطبّ ثنية عُمَيْرِه. يا مير اصغرهن هكالوحده له صفة سنون صغار ومتراصات وش حلوهن، مثل البرد، وحبّاكّه صاكّ بهن حَمَرٍ مثل خيط الحرير. صارت هي التاليه. يوم كظه الصانع، سنونه صغار ومتراصات وغارسات بالحبّاك، اثره مكع منه سنين، بدل السن الواحد، يوم نتل سنونه الصانع وهي تصرخ: عُمَيْرُ يارجالي ولا لي رجال غيرك. وعلى ما نُخْتُه وهو يمشع السيف ويقرط راس الصانع يا مركّده بالارض. وارجع لعُمَيْرِه قال: عاد اضحكي يا عُمَيْرِه مثل خويّاتك الثرمان، لا تفشلين. يوم رجع عرار وابوه شهوان وسلمن عليهم البنات والى كلهن ثرم، واقعة سنونهن. قال: وش علمكن؟ قالن: عُمَيْرُ جانا وهذا وما سوّى وهذا وما فعل. قال شهوان:

يقول الامير شهوان ابن ضيغم  
يغيبن عني بعض الايام سجه  
تمنيت انا والشّر ما يمتنى به  
على ربايط حب التبن مع مقدم الهوى  
ربايط حب التبن الخيل على ان عليقهن شعير، الشعير هو حب التبن.

جمع عبيدي لكن وصفه  
أذلك ربي يا عُمَيْرُ ابن راشد  
هو ليه ما ظل عقلك يا عُمَيْرُ ابن راشد  
هو ليه يوم جيت العذارا مغيبه  
تخلى العبيديات يمشن حسر  
لهن قدر عند كسّابة الثنا  
لو حضرنا الزمل ما حل جفله  
رد عُمَيْرُ على عمه شهوان قال:

هو ليه ما ظل عقلك يا شهوان ابن ضيغم  
العام ما نرضى لهن مهونه  
وينزلون الضياغم على سلطان مارد ويتعاشرون هم واياوه. يقول يوم جا الضحى هكاليوم وجلس سلطان مارد، له مجالس من طالع، وهو يفصخ هدومه عرار على هكالبركة قباله ويقوم يسبح بالعين اللي تحت القصر، عين خدما. يقول والى ما جنسهم جنس الاوادم. السلطان يوم شاف لون مصلخ عرار، زين زوله وحلو لونه وخلقته قال: عرار! قال: نعم. قال: والله لو القى بنت مثل زين لحمّك وزين ممّصلخك يا عرار اني لأزنه بالميزان ذهب لهله. قال: مير ما انت صاق. قال: والله لأزنه بالميزان. قال: شف اختي ميثا مع عشيرك عُمَيْرُ، اطلبه يا منّه سير عليك، والله ما تراعي لي

"الزميل وشيوخهم الثنيان".

عنده، عليه زين يهول، ميثا ما خطت بالقلم، والله اني عدني عبد عنده، اطلبه اياه والله وامان الله لاجوزك اياه. قال: والله لو اطلبه اياه ان يعطين اياه. قال: والله ان ما تفرح به أو تقضبه، هذي عشرة سن، ضحكه، تبيه يعطيك ميثا! قال: والله الا اطلبه. قال: اجل لا تطلبه اياه الا الى صك المجلس، الى صك المجلس رجال قل طلبتك يا عمير ولا تعلمه باللي تبني، والى قال عطيتك قل له قل ضيغميه، لاجل انه الى قال عطية ضيغميه ما يقوى يرجع بكلامه، ما يقدر يهون عن عطيته، ترنا حنا قانون عندنا يا قلنا ضيغميه خلصت، الى قال ضيغميه قل له ابي ميثا. يوم جا من باكر صبح العيد ويجي عرار لسلطان مارد والاوه انت يا عرار متطيب له طيب يعني ما يوجد مثله. قال: وش هالطيب معك. قال: هذا ما هو طيب، هذا ريح اختي ميثا اللي ذكرت لك، حبيته من شوين، هذا ريح نسمة هاللون. قال: ودايم هاللون؟ قال: دايم. والى عمير مسير اول على السلطان والسلطان كاسيه له جوخه. وعمير ما هوب طويل، مربوع ومليان. وصي السلطان لعمير قال يجينا. سير عليه عمير. والى مدخل القصر باب كبير وبه له خوخة بوسطه على قد ما يدخل الرجال. السلطان قال لعمير طلبتك. قال عمير: عطيتك. قال: قل ضيغميه. قال: ضيغميه. قال: يذكرون ان عندك انثى ومن حقنا عليك انك تجزل عنه وتنطينا اياه وانت اطلب اللي انت تبني. دري عمير ان عرار وشهوان نكتوا به عند السلطان بيون كصمة عظمه. ما انطى غيره، قال: تستاهل، ما يخالف، تكرم لحيتك، لا يكون خاطرك الا طيب، هذي لو هي نعله ما وقت رجلك، مير اسمحو لنا يا ما تغبق البل، ابي منك مهله يا ورد الدبش لاجل انه ما تشوف مظاهيرنا يا زاعن تزهق وتموت، حنا اناثينا مثلنا يزهدن، ان قيدت من هالبيت والله ان تزهق موة الطير. قال: اجل وش الدبره؟ قال: الدبره هي بالعاده الى نامت ما تقوم الا الضحى وحنا يا غبقت البل وغدى عليه النوم ترانا نسري ونرحل ونخليه بالخيمه. نبي نرحل ونخليه لك، لاجل الى قامت والى مظاهيرنا كد هفت واتقت عنه، ما تدري مع وين ولينا. قام من عند السلطان عمير وجا بيبي يهوي مع الخوخة اللي هو دخل معه والاوه منتفخ من الزعل والغيط ولا خشته الخوخة اللي يهوي معه يا ما طلع مع الحيط والى هدومه اول يجرن يا مير يالله يتقطشن ركبته، مندجر. يوم اقبل على اهله والى مير اخوه حميدان اصقه تقليه ميثا. يوم طلع واقبل عليهم، قالت يا حميدان عمير طنيان، ولا والله يطني عمير الشين الهين، شف حتى هدومه هن هدولي طالعات ركبته، طنيان صحيح، اما لاحقته الرهمة علي والا على الدهما. اخوه حميدان اصقه ما يسمع، دوبه ولا همب شاكليينه شكلهم، ويحش، حشاش للخيل وساروح ولا له فرس خياله ولا له درع. وهو يعلمهم قال: سلطان مارد طلبن ميثا، بيبي ميثا واعطيته اياه. وهو يقمز الاصقه قال: ميث ما من ميث لو يقع رأسي بالعيش. يقول والى متنتقات سدايد الطرم من اذانه هذا كبرهن، تناق هاللي ساد اذانه، البلية، الاصقه، من السطر، وقامن اذانه يصبن دم.

وقوموا يَحْتَبُونَ بالليل والصمِيلَ بَيْلٌ ويروُونَ، وهذا وهذا. يوم علقوا العشا وهم ينزعون ويخلون لهم عبدة بالخيمة يكفون عليه حوض البِل. يوم اصبحوا، طلعت الشمس، ليا هذا عرار جاي يتذبل مثل ابليس، جاي يبي يلحق الضو. قال: خلى هالبتن عمير؟ قال: اي بالله الله يطول عمره. قال: من عقلك انه يقفي ويخلي ميثا؟ قال: شف الخيمة خلى به ميثا. قال: مير تولم له والله تجي تلقاه سعيده هالحين مثل الجمسة بهالبيت. قال: لا. قال: علمتك. جا سلطان، يوم جا الى والله هذي العبده تبارز عيونه. وهو لك يضرب الزمار للعسكر. تخبر العسكر ما تنتهض الا المغرب. وتمرح، ما نهجت نيه. هم هكالليلة معشاهم بالفلوق، فلوق آل راشد ورا الشقيق. ومن باكر يكتونهن. ترى به له قارات هذي يقولون له قارات السرى يوم ينحاشون معهن. يوم يكتونهن، من الجوف كتوهن. وهي تطلق حباله الروم عليهم ويجونك مع اثرهم، الدولة يقولون نفسة طويل. وهم لك مع اثرهم ولا يلحقونهم الا بالصريف. ترى دليلي على انه هو يقول خلي بقويرات الصريف مصاب، هاللي عند الطرفية من يسار. تشوف؟ يوم جا الضحى يا هم هم واياهم التيس والفهد، يتناطحون. أخذ الشلفا، العرينية، أخذه الاصفه وهو يلوح على فرس عمير. والى مير بنته جذعه يركبونه ويعسفونه. وهو يتركه عمير، يترك حميدان ويركب هو الجذعه. شمام، وهو يتناطح حميدان هو وسلطان مارد، شمام. السلطان عليه درع لكن معه هكالعرينية اصقته وهو يضربه يوم ضربه يا مودع الدرع قطع، نثر، يا ظاهر من وراوه. هذاك زعج الرمح قبل عاد يستافي والى مير طالع من وراوه، ويقعون كلهم. ويقومون يذودونهم يذودونهم ويطلعون جهامتهم، آل راشد. يقول هو عمير:

كبيرلنا يشفق على ما يضرنا وهو بالعيان من يوم شب وشاب هو يدري ان هالدبرة هذي انه تفصال من عرار.

عمى الراي ما يجلى به الطب والدوا  
يبون ميثا نقوة من حريمنا  
تهيا لنا عند ابرق السيح عرصه  
الى نحونا والحقونا ظعوننا  
ينخننا باسامنا عارفاتنا  
نثني عليهم كلنا يال راشد  
أول من يثني عليل ابن والدي  
حجاب يذود الخيل بيذارع القنا  
تلاقى حميدان وصلطان مارد  
ضربه حميدان بزرقا سنينه  
وقع بحد الدمث بالرمث والغضا  
لو احسب حميدان نطيح لسلطان مارد

عمى الراي ما دام الغراب غراب  
وهذي علينا خزوة وعتاب  
تمنى بها حضور الرجال غياب  
تهايقن من حدر الحني عذاب  
بحساس من تحت العجاج صلاب  
على الخمس ما عجنا لهن ارقاب  
وحصن وزبن الجاذيات حجاب  
ومن ذل منا يدرك بحجاب  
وتهيا لذا من كف ذا صواب  
يامودع رصف الدروع خراب  
يا ظاهر من وراوه ثمان كعاب  
خلوه بقويرات الصريف مصاب  
كسيته من زين الدروع ثياب

هم كلهم مدرّعين الا حميدان ما عليه درع هكاليوم.

تلوموئي وانا على زغزغيه  
جدعت بالسندا ثمانين ملبس  
لو انا على الدهما الطويل ام خامس  
يسبونني بالقصر وانا ابن ضيغم  
انا جامع قصر ببصر وقُرسه  
ليا مني قضبت السيف بالكف لا تخف  
ما ينفع المضيوم غير ابن عمه  
سيرت ميثا معه وليد له اسمه كاعب، جذع، على اخوه عرار وهو يقضبه، عصى  
به، قال: والله لاجوزك وانتى بدمته. واقضبه، عيى به وابطت عنده. عمير انجدع،  
انجدع وجعان، تردت حاله، مريض على ميثا. اخوته يشوفونه مريض ولا يدرون وش  
سبب علتة. لهم مرة من المرات هم رحيل ويضربون على مراحم العام اللي يوم تنهج  
منهم ميثا، قال عقيل للعبده: قودي الرحول بعمك والى تجشمتي مراحنا العام اللي  
منه نهجت ميثا وكاعب، ابكي، اوقفي الرحول وابكي، تراوه يبي يقول وش بكك؟  
قولي: ياعمي هذا مراحنا العام اللي به نهجت من عندنا ميثا وكاعب، تراوه يبي  
ينشذك يقول: عقيل وين هو؟ قولي: هف مع السلف، لا تعلمينه بي. عقيل لابق  
الرحول من تحت القش ويمشي ممشاه، معه. اوقفت العبده وقعدت تبكي. قال: وش  
علمك؟ قالت: ياعمي هذا مراحنا اللي نهجت به منا ميثا العام وكاعب. وهو تقل  
يستقعد، قال: عمك عقيل وين هو؟ قالت: مع السلف راحوا. قال: هو حولنا احد؟  
قالت: ما حولنا الوالي. قال:

سقى الله وقت فات يادار ميثا  
يادار مقرون الحجاجين ليقتني  
اقيف بك والعين غرقها البكا  
وهذا مربط الدهما وهذا مركز القنا  
وهو يقمز عقيل من تحت الرحول ذل يزهد عمير بتالي القصيده والى هو تحت  
حنوك الرحول واقف، هم واحدهم الى خلص القصيده زهد ومات. تكلم قبل يخلص  
قصيده، قال:

انا عارف يا عمير ابن والدي  
ان سلمت الجدعا واخوك ابن راشد  
ان جاد فهو من اهل الجود والندا  
والى والله قوماني عرار ان جوه ذبحهم، ما لهم حيلة به. قال للعبيد: احرصوا  
على الذلول لا يركبه عقيل ينهج يم عرار يذبحه. تحيل بهم يوم طرفت الذلول خطفه  
يوم جرهد الليل ونهج. يوم اصبحوا والى بس مكانه. انغثوا، قدامه عرار قوماني،  
قالوا يتذابح هو واياوه. الجدعا تركض مع الخيل. روحتة هكالليله وما جا من القابله

الا هو عندهم، جا مفلاهم يا هذي اباعر عرار وهذا العبد مَعَه. سلم عليه. قال للعبد: وش الحيلة اتوهل البيت. قال العبد: ما ادري ياعمي، انا محنث علي انه ما تغيب الشمس الا البل باركات بمراحه قدام البيت. قال: انا ابجرّد ذلولي، يعني اجدع عنه شداده، واخليه مع البل، وانت حش، حش من النصي هذا، لَقَط من هالنصي الخضر بالعباة وخل البل تمسّى وانا يا غابت الشمس ابنبطح فوق هالرحول ليا ما اهوي بالبيت مع كَتْمَة البل الى منه رُوحت وانت الى قال وش اللي خلاك تمسّى قولة له ياعمي والله لقيت هالنصي الخضر وتحسّفت به، غَمَضَن قلت القَطُّ منه عشا لمشهور. تراوه يبي يقول والله يالولا حشمة مشهور اني لاطوّح راسك، يتوعّدك بس ما يقول لك شين. دبروا هالدبرة هذي الى والله ان ميثا والسكوت، اخت لميثا ما اخذيه (= ما اخذت، ما تزوّجت)، لهن ببيت بقصره، بقصر عرار. وهو يحوّل من الرحول وهو يسقط بالبيت. والى عندهم عشا وضيوف هكاليله ويدبرن الحريم يم البيت ويطبخن. الوغيد كاعب بالبيت. عَقِيل خمش الوغيد وقام يدغّفه لما بكى. يوم بكى الوغيد قالت ميثا: روعي ياسكوت يم كاعب شوفي وش اللي بكاوه سكّتيه. نهجّت، يوم نهجّت وجت الوغيد ليا الرّجال قاعد وهي تنكس وهي تطق باذنه قالت: عنده له رَجَال هذا لونه. قالت: اسكتي، لا تطرينه لاحد. وهي تنهج يمّه يوم جت والى هذا عَقِيل. سلمي عليه. قال: هاه، وش الحيله؟ قالت: الحيله تعشّ، الى قلطوا الرّجال اقلط معهم وتعش وانا ترن ابلبس الدرع وأخذ كاعب وأخذ السكوت معي وابصير ورا البل، ورا ذوابة البل من غاد قدام مربط الخيل، واطلبه، لى تعشّيت ودري بك، ما هو ذابحك، تراوه يبي يقول لك اطلب، اطلب ما طولها بالراس. انت عاد اطلبه، قل طلبتك ياعرار، تروه يشوف انك تبينن لكن تراوه ما يعطينن، ما يقول جتك، تراوه يقول لك من مرابط الخيل ليا ذوابة البل، حيث اني انا اصير يم عطيته، يم ذوابة البل، الضيغميه ما تُردّ. دارية يبي يعطيه من المال. نهجت، يوم نهجت، وصيري بالمحل اللي تهوجس انه تبي تصير عليه العطيه والبدي به لابسة الدرع ومعه كاعب والسكوت، السكوت ما خذت وعَقِيل بييه تصير له هو. بعد ذلك قلطوا وتعشّوا. يوم ناضوا الرّجال وهو يقمز الصانع واربز على الصحن، هو اول من قعد عليه من القلطة التاليه. قال: وش علم هالصحن هذا تقل قاط عليه عَقِيل الضيغمي، بس عظام تقارش. نط عَقِيل، قال: اي والله قلّطت عليه وتعشّيت. ياهذا عَقِيل. حيفة عَقِيل بالاكل يقولون فخذ الذبيحة يفرسه بيده وينطق العظم وياكل اللحم. هالحين مالهم ما يقدر عرار يمد ايده عليه يذبحه. قال: عَقِيل؟ قال: اي والله عَقِيل قلّطت وتعشّيت مير طلبتك، قصدتك. قال: ابشر، اطلب، اطلب ما طولها بالراس، الله عطاك من مرابط الخيل ليا ذوابة البل. عرار استثنى داخل البيت، خلى الطلبه من طالع البيت، على انه بزعمه ان ميثا اللي يدري ان عَقِيل جاي على شانها انه تبي تصير داخل البيت. قال: قل ضيغميه. قال: ضيغميه. العطيه الضيغميه عندهم ما ترد. يا العطوى حالت على ميثا والسكوت

وكاعب. وهي تاقف ميثا قالت: هذا انا يا عرار. قال: ار اخو ميثا، شور مديوس. وهو يزرقه بالرمح لى هو يضرب الدرع وينزي عنه مثل هذا الك. يا السكوت معه. قال: والسكوت. قالت: والسكوت. قال: يالله، اركب، اركب، اركب ورح بهن معك وامش، امش، السكوت لك وعميرة تنحر رجله، امش ما والله تمرح. قال: والله ما أشت الا تعاهدن. قال: عليك الله وامان الله انهن ما يهذبن باثرك لا معاري ولا مسرجات. وهو يعادل بالعدول السكوت وكاعب ويستردف ميثا واركب واسحب. قال عرار: تعال ياالصانع زين لنا معارق، معارق، معارق، انا عاهدته عن السرج وعن الحرذون، ما لنا الا نطلبهم على خيل عليهن معارق. وهو يقعد لين اصبح الصبح وهو يخرز معارق للخيل، كبن وجلد. ويلوحن على خيلهم ويلحقونهم. عقيل ساري طول ليله على الجدعا. يوم بهج الصبح قال: راعي، تشوفين شين؟ هو ما يلتفت. الضيغمي الى التفت كود ينوخ، خوفا لا يقولون شاف له احد لاحقه وذل والا ذيرة هيبته ونار، شرد يوم شاف الزيله. قالت السكوت: اشوفهم قادوا مشهور يم البيت. هم الضياغم ما احد يشوف مثل شوفهم. يوم اوفت شوي قالت: اشوف لي عجاج ثور من عند البيوت قفونا. يوم اوفى ما اوفى قال: راعي: قالت العجاج قرب لنا. خذوا شوي قالت: هذي الخيل اشوفه تنابط من حدر العجاج. هم عاد اخوانه حاسبين لجيته، لنكسته يمهم ومستعدين، راكبين خيلهم بنات مشهور يتلقفون له. بعد شوي قالت: لحقتنا من قفو خيل ونطحتنا من قدام خيل. الثمره يوم تناطحووا، قال عرار: جاي، جاي يا الضياغم، ما لنا حق عندهم، هذي ميثا ناهجة لرجله.

عقيل اخذ السكوت، اعرس عليه. والى السكوت به طبع، على اسمه ما تحكي ولا تضحك. قال عقيل: وكاد هذي ما تبينن. قالت له ميثا: لا تستحس يا عقيل ترى هذا طبعه. قال هو الا كود استمحنه اشوف هي تبيني والا ما تبيني. قام وجاب حيه ذبحه ونام وحطه بجنبه وتميوت. يوم ارتفعت الشمس ما قام، عادته يقوم قبل طلعة الشمس، ارسلوا له العبده توعيه من الصفرة، قالوا اغديه مصفر. يوم جت العبده وشافت الحيه متلوية عليه وهي تنكس عليهم تصيح: عمي مات، عمي مات، قرصته الداب ومات. يوم لوذت عليه السكوت وشافت الحيه تحسبه قارصته، هم بهالحكي رحيل، يشيلون، وتقوم تشهق وتبكي. قالت:

البدو شدوا وانتوا للرحيل	والجدعا داجت ما لقت من يشيله
عليك يا عذب السجايا عقيل	كم خفرة تبي عقيل حليله
عليت كم من مهرة عقت جريها	بعود القنا والخيل حام جفيله
عليت الى ياعز جارك وجارتك	اخو جارتته وان غاب عنها حليله
ما داور الغرات في شق ثوبه	ولا هو مسايها ولا مستسيله
مدمي خشوم الفوس من شمخ الذرا	ياحامي الضيقات بعسر ثقيلها

قحص هو. خاف لو تكمل القصيده تزهد وتموت. يوم قام وهي تعض يدها لما تخالفت سنونه باصابعه، استحت لا يقولون زهفت على رجله. وتروح تهج على



رجليها. ما احد يقدر يقضبه، الضيغميه لو يقضبونه زهدت وماتت. ويصيرون قدامه  
ويصفون يصلون عند وجهها اغديه ما تمر تقطع صلاتهم، ولا به فايده. وقم ياعقيل  
وياقف قدامه ويمشع السيف ويركي كبده على ذوابة السيف، قال: ان ما رجعتي  
هالحين انا اذبح روعي. يالله رجعت.

ويصيف هكالسنة عرار بالوادي، اجلد بوادي الرمه هذا هو وعربه اللي معه.  
جاهم درو من المدينة وغرقهم، طمهم من الجال الى الجال. هم ما يتوطنون، قوم هم  
وال راشد. يوم جا الصيف، منقطع الصيف بالحماميات والى مير المزن يشوفه،  
عرار. طب قلبه المزن هذا، وهو يركب على الحصان مشهور وهو لك يلقط الشعيب،  
سمع زوير الشعيب ونهج يقوسه على الحصان ويوم اخذ له مده يا مير هذا البياض  
يوم نطحه، زبد السيل، وهو يقلبه. عانقه السيل وجاك. ومع عراقيب الحصان، يقول  
يا منه فهى يقول ضرب على عراقيبه بالسيف والى ارتفع عليه السيل وهز الصوط له  
طلع. يبي ينذر العرب وما امداه. قام لك يصيح، يصيح، يوم جا العرب وهو يصيح،  
يصيح، يا الناس نوما، غاديه، وهو يدمجه مع السيل. زفهم على جيته للعرب وهو  
يزفهم السيل. يقول فرت عميرة مرته من مكانه، وهي تخمش سبيب الحصان،  
تلولست على سبيب الفرس تبي تطلع وهو يقص سبيب الحصان معه ذال لا يقال  
اطلع مرته وخلي قومه الباقيين، ياخي هالجبارة الله يعافينا. رد للسيف وهو يذب  
سبيب الحصان يا قاطعه، تزامن يقولون اطلع مرته وخلي جهامته. أعوذ بالله،  
بهالساعة القشرا، ما ادري كيف طب قلبه، جبار وبه كبر. يوم اصبح يا مير ناقه  
بعقاله على الغفو ووغيد بله راس طلحه يوق، غصن الطلحه قاضب زماله، خب الخام  
اللي هو مزمل به. هذي شريده هكالسلفان، كله ماتت. يوم غاض الما قرب للوغد  
وخذه وقام يرضعه من الناقه، وهي تنكعه الناقه يا ماغصة الوغيد، فضخت راسه  
برجله ومات. امير السبه بالسيف وخله. وايتك على الحصان يم عمير. هو شريده  
ربعه. جاك يم عمير، وقع عليه. قال: يالله حيه. قال: والمحبي لولا كلمه قيلت. متهم  
انه تقال والا ما سمعه. قال عمير: من قاله؟ قال الصانع: والله قلت بقلبي ما ابديته  
بلساني: علكن عنان الحرب ثم لفضنه//على افامهن خزوة وعتاب. هذي هي الكلمة  
اللي هو خايف منه عرار. يعني انك لفضت عنان الحرب وانت حاربنا قبل وجاي  
هالحين، استسلمت. واذبحه يا عمير، ذبح الصانع على هالكلمة اللي هو هولس به  
بس هولاس. قال عرار:

سرى بارق يابو ربيعه لكنه  
ابو ربيعة عمير.

خذيثا ثلاث ليال وجانا دبيبه  
يحدرد عش الطير من راس وكره  
غدى ببنا من بنات آل راشد  
غدى بالسبايا والصبايا وعود القنا

من البعد يوضي كالثياب الرهايف  
يدربي الحصا من عاليات المشارف  
يفرق ما بين القلوب الولاييف  
حليات المثاني والقرون العكاييف  
ومطرق اللوز مع زينات الوصاييف

وغدى ببنت الدوسري قريينا      كن اقمه مليون من الشب ذارف  
وغدى بسعدى ساعد الله نوه      تمشي لنا بدرب الهوى ما تخالف  
مواطي وغدان واعناق جفل      واوارك مبرور المهار العسايف  
قال: هَفَوا؟ قال: هَفَوا. قال ابشر بالخلف. وابن له بيت وعطه اخته، جوزة اخته  
خلف لهله. وابن له بيت واعمل له حداد. يا مير يا منه تصوب الانسان القرد ما به  
حيله، الله يعافينا. يقول عاد هو واياه توافقوا. يقول يوم جا بعض الليالي، الليل  
ظلما، واثرية نامت ما بيشت الماخوذ الحصان، ما صكت به البيشه، يعني من زايد  
قردُه. هي هست ونسيت وانجضعت. نيمة مصلوخة معه وهي تظن انه ما حددته.  
وهي تنسل مصلوخته ذالة انه ياعي، وهي تنسل وهي تنحر الحصان وهي تصك  
البيشة. يا مار يوم اقرشت حدى حلاق الحديد وهو ياعي يا هالمبيض يا هي  
مصلوخته، جلده مثل الخامة البيضاء. يا هالمبيض يطلّق عن الحصان. بحر هو من  
قردُه، والا كان عساوه ما ياعي، يا مير هذا المبيض يا مير على حصانه، بيضا هي  
مثل بياض هدوم الرجال. وهو يستدني السيف، وهو يخطف السيف ويثكب عليه  
ويضربه يا ناصفه، يا مير مثل البطيخه<sup>(١)</sup>. يحسب انه نداع، سروق، يوم انه دغف يا  
مير هي. وهو يجيك يم عمير وهو يقعد على النار ويحرته. يوم وعى عمير وبحر. قال:  
هي راحت؟ قال: راحت. قال: وابشر بالخلف. ويعطيه الثالثة، جذعه، صغيره. يا  
الانيثى التالية، انيثى، تقل عقله دون شوين. وخذه. ثريه حمله. وهي تجيه هكالعجوز  
من جماعة عمير ومغلة على عرار، عرار ذابح ولده اول، قالت: يا وليدي هو يغليك.  
قالت: والله ما ادري، يا قال لي شين اطيعه بس انه الى قعد عندي يقوم يتمثل  
ويقصد وانا ما ادري وشلون ارد عليه. قالت: يا وليدي كان تبينه يغليك -هي عقله ما  
من عقل- كان تبينه يغليك بالحيل يا منه قصد عليك ردي عليه قولي: يا صابر على  
الزهذا وانت تشوف//ياحمار ما وراك حمار. يوم قالته وهو يفوع ويلوح على  
الحصان قال: ياشارى الطراد، ياشارى الطراد. قال: عمير الارض، من جاوه جاوه  
الله؟ قلب الحصان، قلبه ما حصل يطلع له احد. وهو يدوكه وهو يدوكه وهو يدوكه  
يما انلعن خامسه وهو يضربه بالعلابي يا مير يوم انطلق راس الحصان، قال ما انا  
مخليه قفوي، واضرب الحصان مع جلامده يا يتدلى راسه وهو يطبق عنه وهو يجحر  
السيف بكبده يا طالع مع فقاره، وهكالخشه، ذبح روحه. وتنشي الانيثة وتجييب  
عطيه، الجذعه، وتجييب عطيه اللي يقولون له اليتيم لأنه مات ابوه عرار وغذاوه خاله  
عمير. وصاروا عاقبته يسمون عيال اليتيم تاليهم الرشيد، هاللي يقول حسن  
التبيناوي:

عيال اليتيم اللي تغازوا حميده      يا نثروا عقب الصباح الاجله  
بقصيدته اللي هو يقول:      منشاه من روس الهضاب المظله  
يامزنة غرا نشت من لديدته

(١) وبهذه الطريقة أيضا قتل نمر ابن عدوان زوجته وضحا، حسب الروايات الشفهية.

هكالسنة جونا العلي غزو ويبون ياخذوننا، حنا من الاخوان، من قوم ابن سعود وهم من هل الجزيره ويبون ياخذوننا. عقب ما حناب مضيفينهم اغار بعضهم على بعض دبشنا وخذه. قال اميرهم طريخم ابن علي: اليتمان اليتمان. قال: عندك منهم. قال: اباعر معازيبكم ردوه. بساع الاهم جايبيته.

ويكبر اليتيم عند عمير ولد له. ويركب ويطب على المدينة ويطلع له حملة بوجهه، رفق. يوم جا يا مير عمير ناحر الدوله ما هو عندهم. وهم يجون العرب وينهبون الحمله، هو قال بغيضه وجابت بنت. ياخالي، ياخالي. قال والله يا وليدي شي وكُل هالحين ولا حناب مجمعيته على قدح وعلى شي . . . وقم يلوج ما يدري وش الحيلة اللي هو يعمل. ويجيه من ربع ابوه هكالرجال قال شف عمك فارس بالعراق. نشد عنه وطب العراق، يوم طب العراق الى مير ماشي قلمه بالعراق والى مير ما يتصنت لاحد ولا يجيه احد، عنده وقاقيف. يقول يوم جا وقت الصلاة وهو يطلب المذن قال ابي اذن عنك. يوم اذن قال: وين فارس؟ وين عمي؟ واوجهي وجهاه، وين فارس؟ وين فارس ابن ضيغم؟ واوجهي وجهاه. استلحقه، يوم جاوه قال: انا ولد عرار، اما ابوي ذبحوه هم، خوالي، ذبحوا ابوي، ودادا ما دادا، كبره. وهو يجرك فارس العراق، السعفة، يجره، دوله والعراق، وهو يجره وهو يغزي عليهم. يوم انه جا طب الجبل وهو يتحسف، قال هذولا يذبحون آل ضيغم. واشترط للعلام انه ينهج ينذرهم وعيى العلام. يا مير ما ينفع الحكي. جوا وصارت مجاوله بينهم هاللي يقول فارس ابن ضيغم:

عمر الفتى يفنى وتبقى فعائيله  
الحمد للي عمّني في فضائيله  
اللي يبى المغزى يدني رحائيله  
لما قزان شهوان برسائيله

يشدون هيضات الدبا من مقائيله  
واتلاه ياطا على رمل يهائيله  
واتلاه يشرب من توالي هظائيله  
الحق توالى القوم واقدى لاوايله  
وعيانى العلام ذهب حمايله  
خيل تغشى البرقا وخيل تهايله  
هماليل صيف صادقات مخائيله  
ورحنا كما ريم جفل من مقائيله  
مثل خشب طلع من السيل شائيله  
عمير تثنى كن تالي رحائيله  
ياما سقونا الشري صافي غلايله

قال العبيدي والعبيدي فارس  
وليت بحد السيف تسعين قريه  
نادى المنادي في منارات فارس  
ثمان سنين وانا بغيضة الطنا  
شهوان ابوه، فارس ولد شهوان.

جرّيت شقران اللحى من دياره  
اولهم ياطا على صم من الحصا  
اولهم مشروبه صاف من الجم  
وردتهم جو يسمي سميرا  
وشرطت للعلام تسعين وضحا  
احلى ما جرى واقشر ما جرى  
يا كن اذيال الدهم دهم آل راشد  
صاحوا علينا صيحة ضيغميه  
ما تشوف جثي الزلم من حر ضربهم  
يا قلت ردوا بوشهم زاد هوشهم  
وكل ما زحمتنا ظعنهم زاد طعنهم

وحطيت به رمح طويل يمايله  
لى واطنا قلبي ولى واغلايله  
العنك يارجل هذي دلايله  
والكبد عده في لهايب ملايله

عفى الله عن عين تزايد هميله  
ثلاثة آلاف عُمَيْر دليله  
وانا شوق مدقوق الشفايا حليله

وذبحت ابن امي بابن ابوي تعمّد  
عَقِيل بالبكر بديار شممر  
وقطعت يدي بيدي وفضخت عيني  
فضخت عين بعين وايدي قطعته  
ويقول عرار:

قال الفتى عرار في راس مرقب  
تخاف من دهما دهوم يجرها  
نحيت عن البلها ثمانين ملبس